

DE
FEVDIS LIGIIS
CONSENSV
MAGNIFICI ICTORVM
ORDINIS



DISPVTABIT

LYDOVICVS SIGFRIDVS
COMES VICEDOMINVS
AB ECKSTAEDT

RESPONDENTE
IO. FRIDERICO L.B. DE STEIN
(AB ALTENSTEIN

DIE XX. APRIL. MDCCXXXVI.

LIPSIAE
LITERIS BREITKOPFIANIS.

S E R E N I S S I M O
P O T E N T I S S I M O Q V E D O M I N O
D O M I N O
F R I D E R I C O A V G V S T O
R E G I P O L O N I A E

M A G N O D V C I L I T H V A N I A E R V S S I A E
P R V S S I A E M A S O V I A E S A M O G I T I A E K Y O V I A E
V O L H Y N I A E P O D O L I A E P O D L A C H I A E L I -
V O N I A E S M O L E N S C I A E S E V E R I A E
E T C Z E R N I C H O V I A E

D V C I S A X O N I A E I V L I A E C L I V I A E M O N -
T I V M A N G R I A E E T W E S T P H A L I A E S A C R I R O M A -
N I I M P E R I I A R C H I - M A R E S C H A L L O E T E L E C T O R I
L A N D G R A V I O T H V R I N G I A E M A R C H I O N I
M I S N I A E E T S V P E R I O R I S I N F E -
R I O R I S Q V E L V S A T I A E

B V R G G R A V I O M A G D E B V R G I C O M I T I P R I N C I -
P A L I H E N N E B E R G I C O C O M I T I M A R C H A E R A V E N S -
B E R G A E E T B A R B Y A E D Y N A S T A E
I N R A V E N S T E I N
E T C .

D O M I N O S V O
C L E M E N T I S S I M O

*SERENISSIME AC POTEN-
TISSIME REX,
DOMINE CLEMEN-
TISSIME,*

***D**um nexum inter vasallos li-
gios et dominos ipsorum me-
cum reputo, simul deuotissima re-
colo*

colo mente duplex illud et subiectionis et feudale vinculum, quo propitia nascendi sors REGIAE MAIESTATI TVAE me adstrinxit. Vt igitur AVGVSTISSIMO NOMINI TVO primitias hasce Academicas, perenne pietatis et obsequii monumentum, consecrare auderem, ex ipso argumento fiducia nascebatur. Confirmabat animum tum ingenita TIBI in bonas litteras

ras propensio, tum clementia singularis, qua me bis iam, sub auspiciatissimum TVVM ad hanc Musarum sedem aduentum, studiosae iuventutis nomine pia vota humillime offerentem, excepisti. Supremo Numini pro perpetua REGIAE MAIESTATIS TVAE et SERENISSIMAE REGINAE incolumitate ac felicitate, CELSISSIMIQUE PRINCIPIS

*CIPIS REGII et totius AV-
GVSTAE DOMVS salute ar-
dentissime supplico,*

*SACRAE REGIAE MA-
IESTATI TVAE*

deuotissimus et obsequentissimus

LVDOVICVS SIGFRIDVS
COMES VICEDOMINVS AB ECKSTAEDT.

CONSPECTVS DISSERTATIONIS.

- §. I. *Instituti ratio.*
§. II. *De feudorum origine sententiae variae.*
§. III. *Feudi definitio, eiusque attributa.*
§. IV. *Feudi diuisiones potiores.*
§. V. *De seruitiis feudalibus.*
§. VI. *Feudorum Imperii ortus.*
§. VII. *Eorum progressus et ius hereditarium.*
§. VIII. *Ducum comitumque officia antiqua.*
§. IX. *Status feudorum Imperii hodiernus.*
§. X. *Diuerſi vocabuli Ligium significatus.*
§. XI. *Etymologia vocis ex variorum sententia.*
§. XII. *Definitio feudi ligii.*
§. XIII. *Dari feuda ligia, contra dissentientes ad-*
struitur.
§. XIV. *Aduersariorum argumenta ulterius ex-*
penduntur.
* §. XV.

- §. XV. *De origine feudorum ligiorum coniectura.*
- §. XVI. *De symbolis feudi ligii, ubi de dextra fidei pignore agitur.*
- §. XVII. *De implicatione manuum in foederibus sancientis.*
- §. XVIII. *De ritu inuestiendi vasallos ligios implicatis manibus ligatisque pollicibus.*
- §. XIX. *Vasallos ligios non dari, nisi summorum principum, probatur.*
- §. XX. *An vasallus ligius esse possit duorum dominorum?*
- §. XXI. *De feudi ligii refutatione.*
- §. XXII. *Reliqua singularia feudi ligii examinantur.*
- §. XXIII. *Vinculum feudale ligium maiestati principis nihil derogare, ostenditur.*
- §. XXIV. *An feuda Imperii sint ligia?*



§. I.

IN consideratione status Imperiorum publici liberalibus, et ad rerum causas cognoscendas, eminentibus ingeniis, nihil potius, nihilque accuratori examine dignius occurrere potest, obligationis vinculo, quo ciues superioribus, et superiores ciuibus vicissim sunt obstricti. Sicuti enim ex mutuo hoc impetrantis et parentium habitu ipsa Imperii forma totiusque regni compages dignoscitur; ita quoque, vel plane sublato eo, vel aliquantisper immutato, aut penitus corrui, aut ad minimum in aliam

A

con-

conuertitur. Voluens haec animo, operae pretium me facturum esse, arbitratus sum, si, ad edendum specimen academicum, partem huius nexus nobilissimam delibarem. Etenim constitutum mihi est in praesenti, ex iure feudali ea paulo vberius examinare, quae ligiam vassallorum erga dominos fidem respiciunt. In quo proposito animus eo magis confirmatus fuit, quo pauciores hanc rem data opera excutiendam sibi sumserunt. Alii enim in commentariis suis feudalibus quasi aliud agendo feuda ligia obiter tantummodo attigerunt: Alii, qui, ex instituto illam se tractaturos, professi sunt, aut breuiter et strictim, prout e re ipsorum visum fuerat, disseruere ⁽¹⁾, aut singularia quaedam huius doctrinae solum capita explicauerunt ⁽²⁾. Alii denique fufius et maiore cum cura, quae hac in parte sparsim latebant, collegerunt, casusque dubios accuratiore diligentia inuestigarunt ⁽³⁾. Cum vero horum sententiis non vbique accedam, haut alienum a studiis meis visum est, eorum opiniones aut refellere, aut diuersas recensere, nec vllam, nisi idoneis probatam
argu-

argumentis, meam facere. In ipsa vero elaboratione hanc ingredi viam meditatus sum. Antequam ad tractationem feudorum ligiorum me accingam, generaliter quaedam de feudis praemittam, et statum feudorum Imperii tam antiquum, quam mediae et recentioris aetatis, repraesentabo, vt deinceps ad feuda ligia eo melius transire, totamque materiam non interrupta serie persequi possim.

- (1) Qualis Dissertatio STEPHANI KVNLEIN de *ligia Principum Imperii fide*, Altorf. 1705 habita.
- (2) Quod fecit AVCTOR *Considerationum feudalium binarum*, quarum altera de *obligatione ex ligio resultante feudo agit*, Hannouerae, 1708, 8.
- (3) IO. IAC. GERCKENRODVS in Dissert. *de feudis ligiis et non ligiis*, Marburgi Cattorum, 1722.

§. II.

Feudorum qui originem ex historia aliisque monumentis eruere sibi proposuerunt, in tantas inciderunt difficultates, vt vix aliquid certi hac in re statuere possent. Multi scilicet, illam augustiore quasi reddi, crediderunt, si a Romanorum institutis arcefferetur. Neque tamen omnes, qui

hanc fouent opinionem, feuda ex eodem fonte deriuant, fed ea nunc a praediis illorum ftipendiariis (1), nunc a clientelis (2); nunc a limitaneis agris (3) repetunt. Innituntur autem duobus praecipue locis, apud AELIVM LAMPRIDIVM in Alexandro Seuero (4), et FLAVIVM VOPISCVM in Probo (5), ex quibus apparet, Imperatores militibus ea, quae ab hostibus caperent, sub militandi conditione concessiffe. Sed quamuis alii, istos agros, quoad conditionem militiae, conuenire cum feudis, concedant; in reliquis tamen, et in eo maxime, quod hereditario iure ad filios transfirent, ab illis differre, contendunt. Plerique vero recentiores fcriptores ad antiquiffimos Germaniae mores feuda referunt (6), incerti tamen, cuinam genti eorum incunabula fint tribuenda. Multi enim folis illa Francis (7), alii Longobardis, populo itidem Germanico (8), adfcribunt. Nec defunt, qui perfuafum habent, pedetentim apud plures gentes Germanici sanguinis inualuiffe, vt sub promiffione fidelitatis, et praefertim in bello, exerceretur liberalitas, donec

nec specialis quaedam feudorum disciplina efformaretur (9). Huic autem militandi conditioni fidelitatis adhuc lege adiecta, vassalli magis magisque dominis obstringebantur, ex qua tandem obligatione ligium illud vinculum fuit enatum.

- (1) LVCAS DE PENNA *in Comment. ad l. Quicunque Cod. de omni agro deserto.*
- (2) GVILIELMVS BVDAEVVS *ad l. Herennius D. de Euictione.*
- (3) VT CAROLVS FRESNEVS DV CANGIVS, in *Glossario mediae et infimae Latinitatis* voc. feudum. IAC. GOTHOFREDVS *ad l. 1. Cod. Theodos. de terris limitaneis*; quibus nuper accessit NICOLAVS HIER. GVNDLINGIVS *in Gundlingianis* P. I. n. 1. §. XI.
- (4) c. 58. *Sola, quae de hostibus capta sunt, limitaneis ducibus et militibus donauit, ita vt eorum ita essent, si beredes illorum militarent, nec vnquam ad priuatos pertinerent, dicens, attentius eos militaturos, si etiam sua rura defenderent.*
- (5) c. 16. *Veteranis omnia illa, quae anguste adeuntur, loca priuata donauit, addens, vt eorum filii ab anno octauo decimo mares duntaxat ad militiam mitterentur, ne ante latrocinari, quam militare, discerent.*
- (6) Inter quos praecipue HVLDERICVS AB EYBEN *in Electis feudalibus* II. l. 5. 6. IV. l. seq. et ITTERVS *de Feudis Imperii* c. 1. §. 7. seq.
- (7) CAROLVS MOLINAEVS *Comment. ad Consuetudines Paris.* tit. 1. de feudis.

(8) GVIDO PANCIROLLVS, et GRYPHIANDER *de Weichb. Sax. c. 49. n. 2.*

(9) STRYCKIUS *in Exam. Iur. feudalis cap. 1. quaest. 4.*

§. III.

Inter tot vero iuris feudalis scriptores, varias excogitatas fuisse feudi definitiones, dum quisque pro captu suo aut nouam inuenit, aut inuentis aliquid adiecit, eo minus mirandum est, quo rarius, qui eandem rem tractant, eadem de illa sentire solent. Omnes tamen eo fere redeunt, quod feudum sit *res, in dominium utile sub lege fidelitatis concessa*. Formam igitur feudi in dominio feudali et mutua fidelitate ponunt. Qui autem accuratius indolem feudorum explicare voluerunt, triplicis generis attributa notauere, essentialia, naturalia, et accidentalia. Essentialia vocant, quae feudum ita constituunt, ut designat feudum esse, ubi illa deficiunt: Qualia sunt dominium directum et utile, itemque promissio fidelitatis feudalis. Naturalia appellant qualitates, quae, secundum naturam feudi, in quouis eorum genere praesumuntur, donec probetur con-

contrarium, quo pertinet, vt vassallus iurato promittat fidelitatem, vt praestet seruitia etc. Ad accidentalia denique referunt conuentiones, quae a contrahentibus adduntur. Ex his tribus singulorum formulam feudorum dimetiendam esse, arbitrantur.

§. IV.

Prout variae feudorum sunt affectiones, quarum aliae adesse debent, aliae abesse possunt, ita variae quoque exinde diuisiones enascuntur. Praecipua est, cum feudum distinguitur in proprium et improprium; proprium subdiuiditur, in vetus et nouum. Respectu obiecti feudum est vel ecclesiasticum, vel seculare; ratione dignitatis, vel ignobile, vel nobile, quod iterum, aut regale, aut non regale, et hoc denuo modo mediatum, modo immediatum est. Intuitu situs aut loci, distingui solet in feudum in curte, et extra curtem. Porro, quoad obligationem, diuiditur in ligium et non ligium, de qua diuisione infra plenius agemus. Feudis propriis annumeratur etiam feudum datum. Impropria vero feuda sunt,

sunt, respectu acquisitionis, feminina. Huc etiam plerumque refertur feudum oblatum, quod quidam ratione constitutionis agnoscunt, vbi vero semel constitutum, a proprii natura, non credunt, recedere; quoad obiectum feudum improprium vocant, quod in re mobili constituitur, vt est feudum pecuniarium. Intuitu seruitiorum diuiditur in francum, vbi nulla praestantur seruitia, et conditionatum, vbi illa sunt restricta; quo pertinent feudum Palatinum, castrense, censuale, quaternatum, guardiae, guastaldiae, aduocatae, aperturae, et quae sunt reliqua. Quemadmodum vero plerisque pactorum generibus nouae semper leges adiici possunt; ita hoc in feudis etiam saepenumero contingit, adeo, vt si ad ea, quae singulorum propria sunt, respicias, infinitas fere feudorum species possis effingere.

§. V.

Ex tanta seruitiorum praestandorum varietate ea solummodo decerpemus, quae ad militiam spectant, cum omnibus, qui leges feudales
Lon-

Longobardorum, Francorum, Sueuorum ac Saxonum inspexerunt, cognitum satis perspectumque sit, potissimas vasallorum praestationes in seruitiis militaribus constituisse ⁽¹⁾, atque feuda inde imprimis ortum habuisse. Non tamen omnium eadem erat seruitiorum ratio. Multi enim vasalli dominos contra omnem hostem, legibus non exceptum, & in quemcunque locum ⁽²⁾, ipsi met sequi tenebantur, quod seruitium corporis appellabant ⁽³⁾. Alii ad certos solum vsque fines, et limitatum tempus, dominum comitari cogebantur ⁽⁴⁾. Alii vero, quorum conditio, aut ex gratia principis, aut ex pacto, melior erat, non extra prouinciam in hostem ibant ⁽⁵⁾. Interdum etiam expeditionem quidem non suscipiebant, missō tamen substituto extra patriae fines, aut soluta dimidia redditus annui parte, quod Heribanum Franci nominarunt ⁽⁶⁾, ipsi ad patriae defensionem sine vlla excusatione erant adstricti ⁽⁷⁾. Qui autem dominis seruitia praestare denegabant, feudo mulctabantur ⁽⁸⁾, nec ipsis illud militiae detrectandae causa licebat alienare ⁽⁹⁾. Quod

B

cum

cum in omnibus fere feudis contingat, et omnes vassalli ad defendendam patriam arma suscipere teneantur, eo magis in feudis ligiis hoc locum habere debet, quo fortius illud vinculum feudale stringit.

- (1) Conf. I. Feud. l. §. 4. I. feud. 5. princip. Ius feud. Sueu. art. 8. n. l. et Sax. c. 5.
- (2) RIGORDVS in ann. 1188. *Rex Francorum Philippus Pulcher Richardum Regem Angliae quasi hominem suum commonuit, ut, sicut iurauerat, mare cum eo transfiret.*
- (3) *Regeslum Andegauenſe* sub an. 1310. *Les Barons ſont hommes liges de Monſeigneur, et li doivent ſervices de corps, et de chevaux, et d'armes.* Plura exempla vid. apud FRESNEVM Gloss. voc. ſeruitium corporis.
- (4) *Ius feudale Suenic.* cap. VIII. §. 1. seqq.
- (5) FRESNEVS voc. hoſtem: *E prouinciis ſeu e territoriis dominorum ſuorum excedere pro expeditione facienda non fuiſſe adſtriſtos vaſſallos, diſerte habet.* GVIBERTVS lib. 5. Hiſt. Hieroſol. c. 24. *Barones Bohemici in vita Caroli IV. Imp. ſub finem: Domine Rex, de iure noſtro exiſtit, et ab antiquis temporibus inuiolabiliter obſeruatum, quod extra regnum non debemus armis proficiſci, ſed intra regni limites ipſum regnum contra eos, qui hoc hoſtiliter inuadere conantur, pro viribus defendere et tueri.*
- (6) De Heribanno vid. plura apud FRESNEVM voc. Heribannum, add. P. PITHOEI *Aduerſar. Subſeciu.* L. II. cap. vlt.
- (7) FRESNEVS loc. dict. *Non omnes tamen hoſtes, vel hoſtem facere tenebantur, ut loquuntur Leges Longobard.* lib. 3.

lib. 3. tit. 4. §. 3. 4. Capitul. 1. an. 810. c. II. Capitula Caroli C. tit. 31. c. 26. et Append. 2. 30. sed qui hostem debebant, ut est in iisdem Capitulis, tit. 43. c. 18. vel qui per se poterant expeditionem facere, tit. 31. c. 27. Ut qui caballos habebant vel habere poterant, ibidem. c. 26. ita tamen, ut interdum expensarum partem alii, qui in hostem non pergebant, iis exsoluerent, qui expeditionem suscipiebant. Sed et nec illi immunes erant a bellicis oneribus: nam, ut est in d. c. 27. illi, qui in hostem pergere non poterant, iuxta antiquam et aliarum gentium consuetudinem ad ciuitates nouas, et pontes ac transitus paludium operabantur, et in ciuitate atque marcha Waſſas faciebant, ita ut ad defensionem patriae omnes sine ulla excusatione venire tenerentur: quod et habet EGINHARDVS Epist. 22. Adde Capitula Caroli C. tit. 7. c. 69.

(8) II. feud. 24. §. 2.

(9) *Leges Longobard.* lib. 3. tit. 9.

§. VI.

Haut minores difficultates occurrunt, ubi speciatim de feudorum Imperii Romano-Germanici origine disquiritur. Plerique ⁽¹⁾ illam a Carolo M. deducunt temporibus, cum, hoc regnante demum, Imperium Romanum Francico Germanicoque regno fuerit vnitum. • Non desunt tamen, qui eam ad Ottones proferant, persuasi, feuda a Carolo M. constituta, Imperii feudorum nomine insigniri non posse, quia per Imperatoris

titulum solummodo hereditarium dominium Romae, et prouinciarum, quas Imperatores hactenus in Italia per Exarchos rexerant, consecutus fuerit. Qui vero primam amplexi sunt sententiam, sub Ottonibus quidem formam suam accepisse feuda Imperii, fatentur, sed tamen iam Caroli M. aeuo illorum indicia reperiri, vrgent; Si quidem ille plura et maximi momenti constituerit beneficia (2) et subactis Longobardis, Saxonibus, aliisque variis populis, duces, comitesque ad dies vitae praefecerit, qui has prouincias regerent, nomine Imperatoris subditis ius dicerent, Imperatoremque in bello (3), postulante necessitate, comitarentur. Posterioris autem opinionis fautores imprimis monent, acquisitum a Carolo M. Romanum Imperium non tam Germanicum, quam Romano-Francicum dici debere, adeoque vix vltra Ottonis M. tempora in indaganda feudorum Imperii Romano-Germanici origine, adscendi posse. Controuersiam, vtrum feuda Imperii originarie data, an oblata fuerint, ita diiudicandam esse, crediderim, quod neque

mere

mere feuda data, neque mere oblata, sed quaedam a statibus bona Imperatoribus in feudum oblata, alia ab Imperatoribus in feudum statibus concessa cenferi debeant.

(1) Inter quos eminet ITTERTVS C. I. §. II.

(2) AYMONTVS lib. V. C. I. *Ordinavit autem per totam Aquitaniam Comites Abbatesque plurimos, quos vassos vulgo appellant.*

(3) HERMANNVS VVLTEIVS *de iurisdic. in praefat.*

§. VII.

Caeterum Caroli Magni aevo temporaria fuerunt beneficia, donec sub Ludouico Pio, et posteris eius, mos inolefceret, vt praedia sempiterno iure possidenda concederentur (1). Cumque deficiente in Germania stirpe Carolingica maiora in dies incrementa caperet auctoritas ducum comitumque, liberiolem ipsi et ad heredes quoque transiturem imperandi vim meditati sunt. Id imprimis Henrici Aucupis exemplo constat, qui, aequo animo non ferens, paternum sibi ducatum a Conrado eripi, ita, vel inuito Rege, illum asseruit, vt a WITICHINDO dicatur pri-

mus in Saxonia potestate libera regnasse. Sub Ottonibus postea tam frequens fuit horum comitatum ad posteros transmissio, ut quidam affirmare non dubitent, Ottonem M. omnes ducatus atque comitatus ad hereditariam reduxisse formam. Proferunt plerumque exemplum Hermannii Billungi, cui Otto I. ducatum Saxoniae hereditario iure concesserit⁽²⁾. Eodem modo ab Ottone I. Conradum Francum Sapientem Lotharingiae ducatum accepisse, scribunt⁽³⁾. Sed haec etiam si ita se haberent, non tamen probarent, in omnibus Germaniae provinciis, ac comitatibus hanc succedendi rationem his temporibus inualuisse, atque stabilitam fuisse, cum plura exempla in contrarium prostant. Otto enim M. filiis Arnulphi Mali, ducis Bauariae, ademit ducatum⁽⁴⁾, eique Berchtoldum, Arnulphi fratrem praefecit, cui mortuo, Henricus, regis frater, successit. Quin in ipsa Billungorum stirpe, post obitum Bernhardi I. illius filius Bernhardus non hereditario iure, sed Episcopi Meinwerici demum precibus ab Henrico II. ducatum Saxoniae obtinuit.

nuit. Conradum Salicum eo sibi deuinxisse animos, refert WIPPO (5), *quod non sustinuerit, ut antiqua parentum beneficia ulli posterorum auferrentur*. Inter grauamina, quae Saxones contra Henricum IV. Imperatorem proferebant, praecipuum fuisse, aiunt, quod non successionem in bona parentum, sicuti antecessores, permiserit (6). Imo ante Henricum VI. multa huius generis praedia personalia fuisse, non obscure prodit GERVASIVS TILBERIENSIS (7): *Hic (Henricus VI.) Imperator legem instituit apud Teutones, ut, Gallorum et Anglorum more, militiae successionis iure deuoluerentur ad proximiores cognationis gradus, cum antea magis penderent ex principis gratia*. Hinc etiam reputant nonnulli, quod tempore Ottonum comites non dicti fuerint a comitatibus, sed comitatus potius a comitibus acceperint nomen (8). Quae cum ita se habeant, haud obscure intelligitur, non omnes Imperii status vno eodemque tempore successionem in suis beneficiis fuisse adeptos, neque certum tempus, quo adepti sint, definiri posse,

posse, quamquam omnibus fere aetatibus exempla quaedam ducatum aut comitatum hereditariorum occurrant. Hoc vero hereditarium ius aequae, ac superioritatis territorialis, quam status Imperii, turbulentis Henricorum et interregni temporibus, sibi quaesivisse, nonnulli existimant, sub Carolo IV. per Auream Bullam, intuitu provinciarum, quas Principes electores tenebant, et sequentibus seculis per Imperatorum capitulationes, reliquis omnibus magis magisque confirmatum, ac tandem per pacem Westphalicam, cum caeteris illorum iuribus et praerogativis, penitus est assertum.

- (1) De Imperatore Ludouico I. Caroli M. filio, ita scribit antiquus Historicus, THEGANVS, in vita et gestis eius c.19. apud P. PITHOEVUM in *Collect. rer. Francic.* *Erat Imperator in tantum largus, ut antea nec in antiquis libris, nec in modernis temporibus auditum est, ut Villas Regias, quae erant sui et Aui et Tritavi, fidelibus suis tradidit, eas in possessiones sempiternas et praecepta construxit, et annuli sui impressione, cum subscriptione manu propria, roboravit.*
- (2) Quod CHRISTOPHORVS LEHMANNVS in *Chronico Spirensi* lib. V. cap. 5. probat testimoniis ALBERTI ABB. STAD. sub ann. 961. et CRANZII lib. IV. cap. 6.
- (3) Plura exempla extant in NICOLAI MYLERI AB EHRENBACH *Archologia ordinum imperial.* c. IX. §. 2.

(4)

- (4) SIGEBERTVS GEMBLACENSIS ad ann. 936. AVENTINVS *Histor. Boi.* Lib. IV. et V. in principio.
- (5) In vita Conradi Salici p. 429. edit. PISTORII.
- (6) Quod GUNDLINGIVS in *Gundlingianis* Part. III. n. l. §. IX. animaduertit.
- (7) In libro, quem Ottoni IV. Caesari dedicauit et *Otia belli Imperialia* inscripsit.
- (8) Hoc ab HENRICO MEIBOMIO in vindiciis Bil-
lunganis obseruatum fuit pag. 20. *Non erat apud vete-
res Germanos moris, quemadmodum nunc est, ut a territo-
rio, quod vel praesidatus iure, vel hereditario possidebant,
nomen sumerent, qui cum imperio erant; quin potius ipsi
regionibus appellationem dabant. Exempla sunt in medio,
ex quibus pauca Saxonica attingam. In Metropoli Cran-
ciana lib. II. cap. XXX. memoratur villa Wallia in Comi-
tatu Bernarii. Diploma Ottonis M. Imp. Magdeburgense
de anno DCCCCXXVII. meminit Comitatus Thietma-
ri in pago Nort-Thuringia: et Comitatus Geronis ac Chri-
stiani. Otto II. Imper. in priuilegio Mindensi, dato
DCCCCLXXIV meminit Comitatus Bernhardi Comititis.
In priuilegiis eiusdem Caesaris, Osnabrugensi sub data
DCCCCLXXV. Hamburgensi de anno DCCCCLXXXIII.
et DCCCCLXXXIIX. nominatur Comitatus Bernhar-
di Ducis. Idem Imp. in diplomate Gandesheimensi anni
DCCCCLXXII. meminit Comitatus Rotwigi Comititis. In-
finita huiusmodi exempla reperias in diplomatis veterum
Imp. Germanicorum: ex quibus planum fit, quod dixi,
Comites olim non a territoriis gubernatis nomen accepisse,
sed eis impertitos.*

§. VIII.

Ducum comitumque officia eo erant com-

C

para-

parata, vt et iurisdictionem respicerent, et rem militarem. Id, quoad duces, speciatim leges Boioariorum ⁽¹⁾ non obscure innuunt, dum eorum munia ita definiunt, *vt in exercitu ambulare, et populum iudicare debeant*. Et ducibus quidem praecipua in bello auctoritas ⁽²⁾, iisque regulariter comites subordinati fuisse creduntur ⁽³⁾. Hinc, tanquam aliquid singulare, notat FREDGARIVS ⁽⁴⁾, in bellum contra Vascones decem duces cum exercitibus, *exceptis comitibus, qui super se ducem non habebant*, perrexisse. Praeterea a comitibus ad duces causas grauiores, quibus diiudicandis ipsi impares erant, fuisse delatas, constat ex legibus Boioariorum ⁽⁵⁾. Comites praesertim iudicis munus obierunt ⁽⁶⁾, eo discrimine, vt comitibus prouincialibus non liceret ius dicere in palatio, palatini vero saepe numero in prouincias ad dirimendas causas mitterentur ⁽⁷⁾. Nullus tamen eorum militiam, neque in bellis defensiuis, neque offensiuis, potuit detrectare ⁽⁸⁾: atque ita reuera tam arcte obstricti fuerunt regibus, quam ligii vasalli dominis suis; adeo vt, si

. non

non bene fungerentur officiis, aut decretum regis contemnerent, honoribus et beneficiis priuarentur⁽⁹⁾.

(1) Tit. II. cap. 34.

(2) GREGORIUS TVRONENSIS lib. IV. cap. 45. f. 51. edit. THEODOR. RVINART. *Rex Godegisilum et Gunthramnum duces in capite dirigit.*

(3) ANNAL. FRANCORVM ann. 748. *Pipinus Grifphonem, fratrem suum, ducum more, duodecim comitatibus donauit.*

(4) In Chronic. cap. 78.

(5) Tit. II. cap. 5. §. 4. *et si talis homo potens hoc fecerit, quem ille comes distringere non potest, tunc dicat duci suo et dux illum distringat secundum legem.*

(6) Formulam institutionis eiusmodi comitis ex Charta Caroli M. adfert MEIBOMIVS ad WITICHINDI L. II. *Quapropter in illa parte Saxoniae Trutmannum, virum illustrem, ibidem comitem ordinauimus, ut resideat in curte ad campos, in mallo publico, ad vniuersorum causas audiendas, vel recta iudicia terminanda: iisque aduocatum omnium Presbyterorum in tota Saxonia fideliter agat, superque Vicarios et Scabinos, quos sub se habet, diligenter inquirat, et animaduertat, ut officia sua sedulo peragant: tandem idem comes omnia sua sibi singulariter a nobis praescripta toto conatu ac viribus perficiat, etc.*

(7) FRESNEVS verb. Comites Palatini: *Neque tantum in palatio ius dixere comites palatini, sed etiam in prouinciis. Auctis enim et longius productis Regni ac Imperii finibus, quo subditorum leuaretur labor, ac eorum impensis parceretur, mittebantur subinde comites palatii, qui supremo iure Iustitias, ut tunc loquebantur, facerent, et*

causas, quas ab iis dirimi ac iudicari necesse erat, terminarent. Quae variis testimoniis atque exemplis more suo confirmat.

(8) GREGORIUS TYRONENSIS lib. VI. c. 41. item c. 19. et alibi passim.

(9) Quod apparet ex loco apud LEHMANNVM in *Chronico Spirensi* lib. II. cap. 16. *Si quis dux de prouincia illa, quam rex ordinauerit, tam audax, aut contumax, aut leuitate stimulatus, seu proteruus et elatus, vel superbus atque rebellis fuerit, qui decretum regis contempserit, donato dignitatis ipsius ducatu careat, insuper spe supernae contemplationis sciat, se esse condemnatum, et viam salutis amittat.*

§. IX.

Non multum a vero abludit, ex talibus ducum comitumque officiis partim orta esse territoria et regalia, quae hodie Imperii status stabili iure possident. Vtrum autem ea feudi, an allodii iure, ab Imperio teneant, in varias Doctores sententias discesserunt. Sunt, qui affirmare non dubitent, omnia Principum feuda, Henrici VI. Imperatoris sanctione, in allodia, hoc est, ab omni clientela, libera et soluta, transmutata fuisse ⁽¹⁾; alii vero, status Imperii, omnesque fortunas ipsorum feudali vinculo ab Imperio pendere, contendunt. Sed nec vnam, nec alteram sententiam sine discrimine

crimine admittendam esse, putauerim, cum non solum mere allodialia (2) et feudalialia (3) inueniantur bona, sed etiam mixta, vbi nempe regalia feudali lege habent status, fundus vero allodialis est (4). Feuda Imperii, prout quisque vinculum, quo status Imperatori et Imperio sunt obstricti, vel laxius, vel arctius sibi finxit, varie fuerunt definita. I T T E R V S (5), qui fusius atque operosius plerisque aliis hanc doctrinam pertrahauit, illa definit *feuda ligia, quae Imperator aut Imperii consors elargitur, Vasallos ad fidelitatem sibi atque Imperio exhibendam obstringens*. Qualiscunque autem eorum sit natura, id certo constat, hodie maiora ab Imperatore sine praescitu et consensu statuum non posse conferri (6). Neque hos Imperatori soli, sed Imperio simul promittere fidelitatem, ex formulis vbique obuiis (7) constat. Hinc Imperator quoque illam statuum obligationem ad hereditarias suas prouincias extendere nequit (8). Certe, id ne fiat, in Capitulationibus Leopoldi et Augustissimi Caroli VI. expresse cautum est (9). Idem etiam argumentum

initio huius saeculi Elector Colonienſis, pro cauſa ſua tuenda, adduxit, variisq; exemplis ex hiſtoria illuſtrauit⁽¹⁰⁾. Eiufmodi bellum fuit, quod Leopoldus, tanquam Hungariae Rex, aduerſus Suecos M D C L V I I. ſuſcepit. In ſolenni contra bello Imperii omnes ac ſingulos ad praefanda teneri ſeruitia, extra omne dubium fere poſitum eſt. Quamvis enim non ipſi ſemper expeditionem ſuſcipiant, ipſorum tamen eſt, pecunia, aut militibus, Imperium adiuuare. Nec licet ipſis neutras ſequi partes, niſi venia ab Imperatore et ſtatibus impetrata⁽¹¹⁾. Quod et dexterrimus iuris publici interpres, I O. I A C. M A S C O V I V S, inter alias quaefſiones non minoris momenti, eo ſpectantes, obſeruauit⁽¹²⁾, et poſt illum Vir celeb. F R I D. H E R M A N N V S K E M M E R I C H I V S data opera excuſſit⁽¹³⁾. Quam autem ſtatus, ſecus agentes, Imperatorique et Imperio ſeruitia recusantes, incurrant animadverſionem, determinat Recessus Imperii Norimb. de anno M D X L I I.⁽¹⁴⁾, et penes quem huius rei ſit iudicium, in Capitulatione nouiſſima definitur⁽¹⁵⁾.

Idque

Idque argumentum latius nuper, amicissimus nobis, LUDOV. BERNH. L. B. A ZECH, est persecutus⁽¹⁶⁾.

- (1) MEIBOMIUS *Opusc. Histor.* p. 332. quem confutauit HVLDERICVS AB EYBEN in *Disquisitione de tit. Nobilium* p. 141.
- (2) Eorum plura exempla Vir celeberr. BURCHARDVS GOTTHELF STRVIVS attulit in libro de *Allodiis Imperii*.
- (3) Illa recenset ITTER. de *Feudis Imperii*.
- (4) Varia annotat exempla ITTERVS c. VIII.
- (5) Cap. II. §. 12. vbi exponit rationes definitionis suae.
- (6) Capitulatio Caroli VI. Art. XI. ita statuit: Wann auch ins künfftige Lehen dem Reich durch Todes-Fälle oder Verwürckung erdffnet, und lediglich heimfallen werden, so etwas merckliches ertragen, als Churfürstenthümer, Fürstenthümer, Graf- und Herrschafften, Städte und dergleichen, die sollen und wollen Wir, die Churfürstenthümer ohne des Churfürstl. Collegii, die Fürstenthümer, Graf- und Herrschafften, Städte und dergleichen aber, ohne der Churfürstl. Fürstl., auch (wann es nemlich eine Reichs-Stadt betreffen thut) Städtischer Collegiorum Vorwissen und Consens, ferner niemanden leihen, auch niemanden einige Expectanz oder Anwartsung darauf geben; sondern zu Unterhaltung des Reichs, Unser und Unserer nachkommenden Könige und Kayser behalten, einziehen und incorporiren.
- (7) Daß sie wollen Ihro Kayserl. Maj. und dem Reich treu, gehorsam und gewärtig seyn.
- (8) Contrarium adstruere conatus est ANONYMVS apud LONDORPIVM Part. II. lib. V. c. 47. cum occasione belli

belli Bohemici, quaereretur, an vassallus imperii, qui Palatino Electori feudali vinculo itidem obstrictus erat, teneatur Imperatorem, qua Regem Bohemiae, defendere.

(9) Art. XI. Noch die Reichs-Lehn-Pflicht auf unser Haus richten.

(10) Vid. *Manifeste de Baviere*, 1705. editum.

(11) Id expresse sancitum est §. 86. Rec. Imp. de an. 1641. Und demnach die von etlichen Ständen von sich selbst angemachte Neutralitäten dem Röm. Reich sehr schädlich, den Feinden desselben aber zu Continuirung des Krieges über die maßen hehilfflich und vortrüglich, zumahlen ein ieder Churfürst und Stand, vermöge des Land-Friedens, auf dessen Handhabung und darauf fundirten Executions-Ordnung, wie auf andern Reichs-Constitutionen, das H. Röm. Reich, so wohl von auswärtigen, als inwendigen Feinden, mit und neben uns, aller Möglichkeit nach, beschützen und defendiren zu helfen, auch die dazu nothwendige Mittel, pro quota beyzutragen schuldig und verbunden ist &c. Sehen, ordnen und wollen Wir, daß nicht allein die von etlichen Ständen allbereit angemachte und unzulässliche hochschädliche Neutralität, darunter die von Uns, etlichen Chur- und Fürstlichen Wittiben beschehene Verwilligung nicht gemeint, gang und zumahlen aufgehoben seyn solle; allermäßen Wir solche hiermit und in Krafft dieses gänglich aufheben; sondern daß auch hinführo einiger Stand des Reichs, wer der auch sey, ohn Unser Vorwissen und Genehmhaltung, sich in dergleichen hochschädliche Neutralitäten nicht einlassen sollen.

(12) In Diss. de bello Imperii solenni Sect. I. §. 29.

(13) In Diss. de Neutralitate statuum Imp. R. G. in bello Imperii illicita.

(14) §. 24. Würde aber jemand, er sey Churfürst, Fürst, geistlich oder weltlich, Prälat, Graf, Herr, von der Ritterschafft und Adel, oder auch von den Frey- und Reichs-Städten,

ten, an Schickung seiner Anzahl Kriegs-Volck, so Ihm, als obsteht, zu dem Zugug auferlegt, oder auch an Schickung und gebührender Unterhaltung seiner hiebevorn, laut des Speyerischen Reichs-Abschieds, auferlegten Anzahl Kriegs-Volcks, oder anderen, so ihm nach Sage desselben Abschieds, oder dieser Ordnung zu thun gebühret, saumig oder ungehorsam seyn, derselbig (wo er ein Geistlicher ist) soll damit alsobald alle seine Privilegia, Schutz und Schirm, die er von Kayserl. Majest. deren Vorfahren, und dem Heil. Reich hat, verwirckt haben, deren privirt und entsetzt seyn. Ist aber der Ungehorsam oder Verbrecher weltlich, so soll er dadurch in der Kayserl. Majest. und des Reichs Acht gefallen seyn, und der Kayserl. Fiscal soll, zu Erklärung solcher Pdn und Straff, gegen denselben Ungehorsamen ohn allen Verzug procediren und vollfahren, und im Fall ihres beharrlichen Ungehorsams, soll sie auch der oberste Feld-Hauptmann, mit der dazu nothwendigen Anzahl Kriegs-Volck überziehen und straffen, immassen der obberührte jüngst Speyerische Reichs-Abschied von solcher Straffe weiter ausweist.

(15) Art. XX. Absonderlich aber auch darauf halten, daß hinführo niemand, hohen oder niedern Standes, Churfürst, Fürst oder Stand, oder anderer, ohne rechtmäßige und gunstige Ursache, auch ungehört, und ohne Vorwissen, Rath und Bewilligung des Heil. Reichs Churfürsten, Fürsten und Stände, in die Acht oder Oberacht gethan, gebracht und erkläret ic.

(16) In eleganti Disputatione de *Proscriptione statuum Imperii R. G.*, quam superiori anno maximo cum applausu hic Lipsiae habuit.

§. X.

Absolutis ex feudorum Imperii doctrina,
quae ad institutum nostrum pertinere videban-

D

tur,

tur, eo expeditiores iam ad ipsa feuda ligia tractanda accedimus, quo magis vtraque in multis conspirant, et mutuam sibi lucem affundunt. Ipsam vocem *ligiam* seu ligationem in aliis etiam causis, quam in inuestituris ac feudis, vsurpatam fuisse, innumerabilia fere docent exempla. Non solum enim foedus ac pactum generatim, et arctius quoduis vinculum (1), sed etiam strictius iuramentum denotauit (2). Ligare porro idem subinde fuit, ac sub interdicto ponere (3), siue excommunicare. Non minus perpetuam obligationem designauit (4). Ex omnibus vero huius vocis significationibus haec praecipue notatu digna occurrit, qua de libera, solida et omnimoda, agendi facultate praedicatur (5). Praeterea certum hominum genus extitisse, sub nomine hominum ligiorum, a vassallis ligiis multo diuersum, KLOCKIUS obseruat (6). Hos a vassallis ligiis in eo discrepare, quod homo ligius totus domino deuotus, res suas potestati domini subiciat, vassallum vero quodcunque feudum solummodo ea lege recipere, vt promittat domino
fidei-

fidelitatem contra omnem hominem, et ideo vafallum non nifi de feudo domino effe obftrictum. Quod hominum genus a Gallis ortum effe, teftatur FORCATVLVS (7). Quidam cum Solduriis Gallorum, de quibus IVL. CAESAR (8) loquitur, comparant. Tales homines, quos litoſ, lidoſ, feu ledos appellabant, adſcriptitii feu ferui glebae erant. Differebant tamen a ſeruis in eo, quod eorum conditio melior eſſet. Hoc enim ex compoſitione feu mulcta pro lito et ſeruo occiſis, quae maior erat in lito, quam in ſeruo, apparet (9). Haec omnia alius adhuc locus ex FRESNEO (10) corroborare videtur, vbi ligiſtatem diſtinguit in perſonalem et realem, quarum illa cum hominibus ligiis fere coincidit. Hanc autem diſtinctionem non vltra ſaeculum XIII. in vſu fuiſſe, ſtatim ſubiungit, cum ſequentibus temporibus vnusquiſque ligius Ligius de feodo inſcriberetur. Hos igitur homines cum vafallis ligiis haud dubie confuderunt Doctores, qui ad feudum ligium requirunt, vt ſe ſuaeque omnia domino ſubiiciat vafallus.

- (1) Quod FRESNEVS in *Glossar.* verb. *ligatio* ex Notitia ecclesiarum Hispaniae, a RESENDIO ex veteri codice edita, annotat: *Domine, si vis, faciam stabilitatem inter nos, et Ligationem firmissimam, ut non sit soluta usque in finem saeculi.*
- (2) Ita Charta FVLCONIS, Abbatis Corbeienfis, an. 1055. apud eundem voc. *Iuramentum* habet: *De quibus omnibus Comiti et Abbati in hac conuentione Sacramento Ligato tradidit septem obsides, ut, si haec violauerit, aliquando intimabitur obsidibus monere dominum suum, ut se iustificet infra 40. dies, etc.*
- (3) ANASTASIVS Biblioth. in praefatione ad VIII. Synodum ibidem voc. *obligati*: *Ignatius vero dum pelleretur, Ecclesiam ligauit, ne quisquam absque se in ea sacra celebrare tentaret officia. Id est, sub interdicto posuit.*
- (4) Sic Ligia residentia pro integra, et continua, sumitur in Charta P. Episcopi Meldensis an. 1239. In *Tabulario eiusdem Eccles.* fol. 50. Honorius III. P. P. *Iuramentum praestitisti de facienda residentia, quae Ligia nuncupatur, in Ecclesia S. Martini Turon. in qua Praeposituram obtines.*
- (5) Hanc in rem FRESNEVS ex Monastico Anglicano Tom. II. p. 10. sequentia adducit: *Ego Iuliana quondam vxor Willelmi le Bret - - in Ligia potestate et viduitate mea tetigi et inspexi, etc.* add. p. 53. 329. Alia p. 247. *Ego Beatrix, quae fui vxor Rualdi de Calua, post mortem eius in Ligia potestate mea, etc.* Eodem sensu de tutela, voluntate, etc. adhibitum hoc vocabulum reperimus.
- (6) *Relat. Cam.* XXVI. n. 46.
- (7) *de Feud.* c. 3. n. 1.
- (8) *de Bello Gall.* lib. III. c. 22. *Atque in ea re omnium nostrorum intentis animis, alia ex parte oppidi Adcantuannus, qui summam imperii tenebat, cum DC. deuotis, quos illi Soldurios*

duros appellant: quorum haec est conditio, ut omnibus in vita commodis una cum his fruantur, quorum se amicitiae dediderint. Si quid iis per vim accidat, aut eundem casum una ferant, aut sibi mortem consciscant. Neque adhuc hominum memoria repertus est quisquam, qui, eo interfecto, cuius se amicitiae deuouisset, mori recusaret.

- (9) Lex Frision. tit. 15. *Compositio hominis nobilis librae 11., liberi, librae 5. et dimidia, liti, librae 2 et unciae 9. ex qua duae partes ad dominum pertinent, tertia ad propinquos eius. Compositio serui, libra 1. et unciae 4. et dimidia. De his hominibus plura habet FRESNEVS verb. litus.*

- (10) Verb. Ligium. *Haec realis, inquit, ob tenementa in feudum ligium concessa praestabatur, quam qui tenebatur exhibere, Ligium de feodo vocant Chartularia 12. saeculi. Altera vero, quae etiam de corpore et persona dicitur, fit ob annuam pensationem, quae sub titulo feudali conceditur. Ad hanc autem praestandam obligatos fuisse omnes successores masculos haereditario iure, probat SALVAIN-GVS, ex charta ann. 1421. quam refert D. BRUSSEL de Vsu feud. L. I. c. II. vnde etiam, qua ratione exhibita fuerit haec Ligeitas, disci potest: *Recognouerunt palam et manifeste, tamquam si essent in iudicio, se ipsos et vtrumque ipsorum suosque in futurum successores, esse, vel leque, et debere esse, et suos praedecessores fuisse homines ligios nobiles et fideles de corpore et persona eiusdem domini Cassenatici et suorum successorum prae caeteris dominis, et ante omnes alios homines et dominos huius mundi, etc. - pro se et tota sua posteritate de corpore et persona, homagia nobilia corporalia et personalia ac fidelitates ligias ante omnes alios homines et dominos totius huius mundi, dicto domino praesenti et recipienti pro se et suis, praestiterunt, nobilium more stando pedes, tenentes manus suas iunctas inter manus eiusdem domini, et osculo pacis inter dictum dominum ac dictos Iobannem et Ludouicum - praestito.**

§. XI.

Tantam alii inter hosce litos, siue adscripti-
tios, et vasallos ligios similitudinem sibi deprehen-
disse videntur, vt ipsum verbum *Ligium* inde de-
riuandum esse, contendant. Adstipulatur illis
FRESNEVS ⁽¹⁾, motus tabulis veteribus non-
nullis, in quibus vasallus ligius per vocabulum
Litge exprimitur ⁽²⁾. Easdem adducit SCHIL-
TERVS ⁽³⁾, et in eo assentitur FRESNEO, quod
vasallus eiusmodi strictior primum non ligius, sed
Litgius vel homo Litges dictus fuerit. Verum
ipsam denominationem non cum illo a Litis
Francorum, sed a vernaculo *Lidig*, *Ledig* petit,
et hanc deriuationem definitioni feudi ligii o-
mnium maxime conuenire, putat GERCKEN-
RODVS, quod talis homo vnice domino suo
contra omnes addictus et ab omni alio nexu liber
sit atque solutus. Id imprimis confirmare studet
antiquis instrumentis, ad quae FRID. SAN-
DVS ⁽⁴⁾ prouocat, et in quibus vasalli ligii et
perfecti vernacula *Ledige-Mannen* efferuntur. At-
que hoc sensu vocabulum *Ligium* saepius adhi-
bitum

bitum etiam in aliis rebus fuisse, iam dicere occupauimus, quae solidum et omnimodum aliquid inuoluunt; vnde nonnullis feudum ligium idem est, ac solidum, non ligium idem, quod non solidum. Sed, quae mira est eruditorum in indagandis verborum originibus dissensio, alii ab Italico *Liga* (5), quod significat foedus seu confederationem, alii a *Liden* seu pati (6), alii a *Lüttig*, parvus (7), alii aliunde ligii appellationem repetunt. FELTMANNVS populum Ligium sibi finxit et inde vocabuli originem arcessiuit (8). Singularis est etymologia, quam ex FORCATVLO adducit PAVLVVS FRANCISCVS ROMANVS (9), ligium a lilio, Gallorum insigni, ideo deriuante, quod eiusmodi feuda, in Gallia primum orta, deinde ad Longobardos fuerint translata. VIGNERIVS (10), BIGNONIVS (11), aliique vocem *lige* ex eodem fonte, quo *leudis*, *leodis*, id est, fidelis, deducunt, quemadmodum vrbs Leodium Gallice *Liege* dicatur. Qui a verbo ligare deriuant, circa ipsam rationem denominationis variant. Sunt enim, qui ligium inde

inde dictum volunt, quod hominio ac professione fidei arctius domini seruitio vasallus alligetur ⁽¹²⁾. Ad quam sententiam tuendam varia scriptorum testimonia adfert FRESNEVS ⁽¹³⁾. Alii vero ⁽¹⁴⁾ a ritu inuestiendi, quo ligatis reges pollicibus vassallos fidei suae adstringere solebant, quemque mox verius explanabimus, rationem desumunt. CUIACII, DIONYSII GOTHOFREDI aliorumque coniecturam, hominum ligiorum nomen ex homologorum, quos cum illis SPELMANNVS ⁽¹⁵⁾ pro Synonymis accipit, appellatione ab imperitis fabrefactum esse, putantium, post IAC. GOTHOFREDVM ⁽¹⁶⁾, SCHILTERVS ⁽¹⁷⁾ reiecit. Sed nolumus singulis doctorum virorum de huius vocis etymo sententiis excutiendis immorari, quemlibet hic suo sensu abundare, facile patientes.

(1) Voc. Ligius T. IV. p. 207. edit. nouiss.

(2) Charta Rainaldi, Vice Comitis de Gimel, an. 1163. apud IVSTELLVM in *Hist. Turen.* p. 34. *pro isto vero feudo idem Rainaldus fuit homo Litges praedicti Vicecomitis Rainmundi.* Alia 1178. *ibid.* p. 35. *Devan son senior, cui home Litge ero etc.*

(3) *Cod. Iur. Feud. Al.* p. 123.

(4)

- (4) *Commentar. in Geldr. Consuetud. Feudal. Tract. II.*
Tit. I. c. 2. n. 7.
- (5) ALTESERRA de *Orig. feud.* c. 8. BRVSSSEL de
Vfu feud. T. I. p. 116.
- (6) ROSENTHAL. *Synopsf. Iur. Feud.* Cap. II. Concl. 4. n. 7.
- (7) conf. EYBEN *Elect. Feud.* c. III. §. 7.
- (8) *De Iure in re et ad rem* c. XIV. n. 29.
- (9) *Diff. de Feudis* prima c. III. §. 12.
- (10) In *Tr. de minori Britan.* p. 159.
- (11) *Ad formulas Marculfi* L. I. c. vlt.
- (12) GVID. PAPAE Decif. 309. GLOSS. in Clem. Pa-
storalis de *Sentent. et re iudic.*, VPTONVS de *militari*
offic. c. 18.
- (13) l. d. E. g. GVILIELMI APVLIENSIS L. III. de
Gest. Norm.
Sed tandem fidei iurando iure ligatus.
GVILIELMI ARMORICI L. II. Philippid.
Esse tenebatur homo ligius atque fidelis,
Et, tanquam domino, iurando iure ligari.
- (14) IO. IOVIAN. PONTANVS de *Bello Neapol.* L. II.
p. 1838. edit. Basil.
- (15) GLOSSAR. VOC. Homologus.
- (16) ad l. 6. C. Th. de *Patrocin. vicor.*
- (17) loc. dict.

§. XII.

Ad definitionem potius feudi ligii pro-
gredimur, et ipsam maximo Doctorum dis-

E

sensu

fenſu inuolutam. Quidam enim ad eſſenti-
am eius referunt capita nonnulla, quae ad acci-
dentalia tantum referri debebant, praeterque
vinculum, quo ſoli eſt obſtriſtus domino vaſal-
lus, adhuc neceſſario requirunt, vt dominus feu-
dum de ſuo concedat. Huius autem opinionis
falſitas vel ex eo apparet, quod nulla plane ratio
ſubeſt, cur feuda oblata non aequae ligia eſſe, ac
data, poſſint: prouti pluribus conſtat exem-
plis (1). Nonnulli, vinculum ligium adeo conſtri-
ctum eſſe, credunt, vt omnimodam ſubiectionem
inducat. Ex quorum ſententia TITIVS (2) di-
ſtinctionem in feuda ligia et non ligia non aliter
admittit, niſi per ligium vaſallum illum intelligas,
*qui ſoli domino vaſallagio et ſubiectione obſtringi-
tur, et non ligium, quando aliis quoque obligatur.*
Sed magnam adhuc, inter vinculum ſubiectionis
et ligium, differentiam obſeruare in procliui eſt.
Alii praecipuam feudi ligii notam in eo ponunt,
quod ſimul in territorio domini directi ſitum eſſe
debeat, et ex duplici illo vinculo, ſubiectioni & va-
ſalli, ligium hoc oriri, contendunt (3). Sed prae-
ter-

terquam quod quis feuda ligia in alieno etiam territorio concedere potest, vinculum feudale et subiectionis non ita semper sunt coniuncta, vt alterum sine altero esse nequeat. Qui vero ad accuratiorem definitionem propius accedunt (4), vnā quidem partem attigerunt, quod nempe vassallus dominum contra quemcunque teneatur defendere, alteram vero omiserunt, quae postulat, vt a nemine, nisi qui superiorem non recognoscit, concedatur. Hoc ergo modo haut incommode definiri possit: *Feudum ligium est, quod a domino, nullum recognoscente superiorem, sub hac conditione conceditur vasallo, vt domino contra quemcunque, nemine excepto, fidelitatem praestet, opemque ferat.* Itaque in eo differt feudum ligium a reliquis, quod concedens nemo, nisi superior, esse possit, accipiens vero domino contra quemcunque, nemine excepto, succurrere debeat. In feudis enim ordinariis vel nulla plane praestantur seruitia militaria, vel contra certum solummodo hostem sunt determinata, aut certe Imperator, vel antiquior dominus semper,

per, siue tacite, siue expresse, a vafallo excipitur; qualis dicitur non ligius.

(1) Apud HERTIVM de *Feudis oblati* Part. II. §. 6.

(2) *Iur. priuat.* lib. XI. c. II. §. 20.

(3) GOTTL. STURMIVS, *Disputation. feudal.* Part. I. §. 38. not. k.

(4) Vt compilatores Iuris feud. II. feud. 99. GEORG. OB-
RECHT. de *Iure Feudor* L. I. c. 5. n. 109.

§. XIII.

An autem, prout definiuimus, feuda existant, acriter in vtramque partem interpretes iuris feudalis disputarunt. Sunt enim, qui diuisionem in feudum ligium et non ligium, tanquam commentitiam, plane reiiciant⁽¹⁾; alii vero, eam admittendam esse, credunt, si pro synonymo illius habeatur, qua feuda in mediata et immediata diuiduntur⁽²⁾. Vtraque autem opinio discedere a vero nobis videtur, sententiae potius eorum accedentibus, qui hanc diuisionem tuentur. Varia quidem, qui negant, feuda ligia existere, afferunt momenta, quibus thesin suam adstruunt, iactantque primo, merum Doctorum esse figmentum

tum hanc distinctionem, neque vsquam in feudorum libris reperiri. Sed si demus etiam, DD. illam inuenisse; haut tamen inde sequitur, non esse fundatam, quandoquidem omnes fere iuris feudalis diuisiones ex interpretum ingenio enatae, nec tamen reiiciendae sunt, si vsus in doctrina praebere possunt. Neque hic feudorum libri, quos habemus, pro norma sumi debent, quoniam non omnes continent feudorum constitutiones, et a priuatis, Friderico I. demum imperante, sunt compilati, sub Carolingis autem, et deinde Henrici V. (3) imperio, plura iam extant feudorum ligiorum exempla (4). Quin ipsi feudorum libri, si recte inspicias, huic distinctioni auctoritatem conciliant, cum non solum vocabulum feudi ligii (5), sed etiam descriptio (6) eius in illis occurrat.

(1) HOTOMANNVS in diss. de *Feud.* c. 6. et in *Lexic. feud.* sub verb. ligius. FINCKELTHAVS *Diss. Feud.* II. §. 27. Controu. 14. BENED. CARPZ. *Diss. Feud.* II. de *variis feudor. diuisionibus ac speciebus* §. 27.

(2) LANGGVY, *Animaduers.* ad COCCII *Hypomn. Iur. Feud.* Tit. III. §. II.

- (3) Hunc enim comitatum Barri, sub ducatus titulo, vinculo feudali ligio Rainaldo, comiti de Barr, concessisse, ex antiquis scriptoribus obseruat CHIFLETIVS, in *Commentario Lothariensi*, c. I.
- (4) Quae congeffit FRESNEVS in Glossar. h.
- (5) II. Feud. 99.
- (6) II. Feud. 93.

§. XIV.

Alterum argumentum, quo feuda ligia negantes, sententiam suam fulcire conantur, ex feudorum textibus depromunt⁽¹⁾, qui praecipunt, vt vassallus in omni feudo dominum iuuet contra omnes, ita tamen, vt Imperator et antiquior dominus excipiat, atque exinde eliciunt, praecipuum feudorum ligiorum requisitum conuenire omnibus feudis. Praeterquam vero quod non omnia feuda praestant seruitia militaria, aut multa sane contra certum hostem tantummodo exiguntur⁽²⁾, eo ipso, dum quis excipitur, feuda ligia esse desinunt. Porro, errorem huius diuisionis exinde ortum esse, obiiciunt, quod, quem Longobardi vassallum appellauerint, illum Itali ligium nominarint; vtramque vero vocem vnum idem-

idemque significare. Quod autem saepius accidit, vt verbum, per quod apud vnam gentem species designatur, apud alteram genus exprimi soleat, et vicissim; id hic quoque euenisse videtur, vt ex specie vasallorum Longobardici Iuris verbum desumerent Latini, quod totum eorum genus indicaret. Adeoque haec obiectio nostram diuisionem minime euerteret. Nec magis iis adstipulari possumus, qui feuda ligia eadem esse, ac feuda immediata, contendunt; quippe feuda ligia quidem immediata, sed non omnia immediata ligia esse debent.

(1) II. Feud. 7. II. F. 28. II. F. 55.

(2) Quorum supra §. V. diuersa recensuimus.

§. XV.

Causae, quae origini feudorum ligiorum ansam praebuerunt, certo determinari vix possunt, cum plurimam partem probabilitate innitantur. Neque hinc mirandum, neminem adhuc illas memorasse. Si coniecturis tamen aliquid dandum est, inde imprimis feuda ligia orta videntur, quod,

quod, cum vassalli saepius debita praestare servitia militaria, vel contra superiorem, vel amicum, vel antiquiorem dominum, recusarent, aut contra dominos rebellarent, hi strictius excogitarunt vinculum, quo illos ad obsequium adigerent, et motus eorum compescerent. Neque definire auserim, utrum cum ipsa feudorum origine statim ortum ceperint, an vero sensim pedetentimque inualuerint.

§. XVI.

Inuestitura omnis uti symbolice ac, pro diversitate feudorum, modo per hastam, modo per vexillum, aut gladium, modo per anulum, aut torquem, modo per baculum et anulum, aut deinde per sceptrum, fieri olim consuevit^(*): ita quoque feuda ligia symbolis suis atque ritibus gaudent. Qui cum manibus imprimis domini directi et vassalli absoluantur, non alienum hic erit, antequam ipsum inuestiendi ritum proprius perlustremus, communem fere omnium gentium morem expendere, quo manus dextra certissimum fidei atque amicitiae pignus habetur. Iam anti-

antiquissimis temporibus et Persis ⁽²⁾, et Parthis ⁽³⁾, et Numidis ⁽⁴⁾, et barbaris populis omnibus, solemne fuit dextris foedera publice ac priuatim firmare. Graecis idem seruatum fuisse, testis est HOMERVS ⁽⁵⁾. Apud Romanos scriptores plurima huius rei vestigia reperimus. Ita CICERO ⁽⁶⁾ *dexteras fidei testes* vocat, et alibi ⁽⁷⁾ exclamat: *Vbi fides? vbi execrationes? vbi dextrae complexusque?* PLINIVS ⁽⁸⁾ *dextram osculis auersam aperiri, in fide porrigi*, scribit. Saepius quoque poetae ad illum morem alludunt ⁽⁹⁾, et passim dextras iungere, fallere, renouare dicuntur, qui vel fidem dant accipiuntue, vel laedunt, vel redintegrant. Inde in numis antiquis coniunctio dextrarum, tanquam fidei, concordiae, mutui amoris, pacis ac foederis, insigne occurrit ⁽¹⁰⁾. Subinde etiam ciuitates, legiones et exercitus, veteri instituto, iunctas dextras, ex auro vel argento confectas, pro hospitii atque concordiae tessera, sibi inuicem misisse, legimus ⁽¹¹⁾. Et sicuti reliquas corporis partes aliis Numinibus, ita dextram fidei consecrarunt Gentiles. Sunt ⁽¹²⁾, qui

rationem, cur dextrae tantum tribueretur, inde deducunt, quod omnis auctoritas dextrae manus virtute constare crederetur. Quo sensu, plurimis veterum scriptorum locis, dextra pro ipsa ponitur virtute⁽¹³⁾.

(1) GEORG. ADAM STRUVIUS, Syntagm. Iur. Feud. c. III. STRYCK. Ex. I. F. c. XII. Q. 7.

(2) De illis praeter XENOPHONTEM, DIODORVM SICVLVM aliosque, quorum testimonia BRISSONIVS in Persicis coegit, testantur CORN. NEPOS in Datame c. X. et Q. CURTIUS de Rebus gestis Alex. M. L. VI. c. 4. ad quem locum varia huius moris exempla FREINSHEMIUS summo studio collegit.

(3) De his IOSEPHVS Antiquit. Ind. L. XVIII. c. 12. ubi colloquii inter Artabanum, Parthorum regem, et Praefidem Romanum, mentionem facit, sic habet: *Et dextram dedit, tanquam maximum confidentiae argumentum, apud omnes illos barbaros; neque enim fidem falleret quisquam ex iis, data semel dextra, neque fidem habere dubitabit, tale securitatis pignus ab iis nactus, a quibus iniuriam sibi metuere poterat.*

(4) Quorum duo memorabilia exempla refert LIVIUS L. XXX. c. 12. Alterum est de Sophonisba, filia Asdrubalis, Poeni, Syphacis, Numidarum regis, vxore, et Massinissa, quo adiuuante Scipio plures hostes in Africa vicit. Genibus enim aduoluta eius, - - *quum modo dextram amplectens, in id, ne cui Romano traderetur, fidem exposceret, propiusque blanditias oratio esset, quam preces; non in misericordiam modo prolapsus est animus victoris, sed, ut est genus Numidarum in Venerem praeceptis, amore captivae victor captus, data dextera in id, quod*
pete-

petebatur, obligandae fidei, *in regiam concedit*. Alterum est de Scipione et Syphace ipso, l. d. c. 13. *His sermonibus circumstantium celebratus rex in praetorium ad Scipionem est perductus. Mouit et Scipionem cum fortuna pristina viri, praesenti fortunae collata; tum recordatio hospitii dextraeque datae, et foederis, publice ac priuatum iuncti. Eadem haec et Syphaci animum dederunt in alloquendo victore.*

- (5) Il. Ω . vbi postquam Achilles Priamum allocutus erat:
Sic fatus Priami dextram, ne forte timeret,
Prendit et hoc dubiam firmauit pignore mentem.
- (6) Philipp. XI. 2.
- (7) In Verrem V. 40.
- (8) Hist. Nat. L. XI. c. 45.
- (9) VIRGILIUS Aen. III. 610.
Ipse pater dextram Anchises, baud multa moratus,
Dat iuueni, atque animum praesenti pignore firmat.
 et IV. 307.
Nec te noster amor, nec te data dextera quondam
- - tenet?
- OVIDIUS Heroid. II. 31.
Pura fides vbi nunc commissaque dextera dextrae?
- SENECA in Hercule Furere Act. II. 370.
Sociemus animos; pignus hoc fidei cape:
Continge dextram.
 Idem in Thyeste Act. IV. 764. *datas fidei manus, et in Medea Act. II. 248. praesidis dextrae fidem, habet.*
- (10) vid. SPANHEM. de Vsu et praest. Numism. Diss. II. p. m. 118. sqq. edit. Elzeu.
- (11) vid. TACITVS Hist. L. I. c. 54. et II. 8.
- (12) DELRIUS ad SENEC. Med. l. d.
- (13) De Symbolis dextrae ac sinistrae manus conf. PHIL-
 CAMERARIUS Meditat. Hist. Centur. II. c. 46.
 F 2 §. XVII.

§. XVII.

Notabiliorem adhuc arctioremque modum amicitiam fanciendi, apud Ponti accolas imprimis quondam vſitatum, nobis describit T A C I T V S ⁽¹⁾, vbi foedus, inter Mithridatem et Rhadamistum initum, commemorat. *Mos eſt regibus, inquit, quotiens in ſocietatem coeant, IMPLICARE DEXTRAS, POLLICESQVE INTER SE VINCIRE, NODOQVE PRAESTRINGERE: mox vbi ſanguis in artus extremos ſe effuderit, leui iſtu cruorem eliciunt atque inuicem lambunt: ID FOEDVS ARCANVM HABETVR, quaſi mutuo cruore ſacratum.* Apud plures etiam alias nationes receptum fuiſſe, vt foedera et amicitias humani ſanguinis guſtu corroborarent, paſſim ſcriptores veteres nobis fidem faciunt. De Scythiſ teſtis eſt L V C I A N V S ⁽²⁾, de Axiaciſ ſpeciatiſ M E L A ⁽³⁾, de Armeniis V A L. M A X I M V S ⁽⁴⁾. Simile quiddam in Lydiſ ac Mediſ deprehendimus apud H E R O D O T V M ⁽⁵⁾. Sed et veteriſ Germaniſ, aut, vt alii rectius legunt, Carmaniſ cruentam potionem, velut ar-

ctiſſi-

etiffimae amicitiae symbolum, tribuit POSIDONIVS apud ATHENAEVM (6). Sunt etiam, qui illud potionis genus, ex vino et sanguine temperatum, quod Affiratum apud antiquos dictum esse, FESTVS docet, huc trahunt, Romanosque etiam interdum, ad fidem adstringendam, sanguinis potionem adhibuisse, ex Catilinae eliciunt exemplo (7). Totum autem hunc firmandi foedera morem non penitus antiquatum, sed, recentiori etiam aevo, passim ab Hispanis apud barbaros in America, inter reliqua noui orbis singularia, repertum esse, LIPSIVS annotauit (8).

(1) *Annal.* XII. 46.

(2) Qui, in *Dialogo de amicitia*, ita loquentem inducit Scytham: *Etenim simul atque incisis digitis sanguinem in calicem distillauerimus, summisque intinctis gladiis ambo pariter admouentes biberimus, non est quidquam, quod deinde nos queat dirimere.*

(3) Lib. II. c. I. *Ne foedera quidem incruenta sunt: sauciant se, qui paciscuntur, exceptumque sanguinem, vbi permiscuere, degustant: Id putant mansurae fidei pignus certissimum.*

(4) Lib. IX. c. II. extern. 3. vbi Sariastrum, quem Tigranem Iuniorem vocat, et a Pompeio in triumpho ductum esse, scribit PLVTARCHVS in *Pompeio* p. m. 310., *aduersus patrem suum, Tigranem, Armeniae regem, ita cum amicis consensisse, memoriae prodidit, ut omnes dextris manibus sanguinem mitterent atque eum inuicem sorberent.*

- (5) Lib. I. n. 13. *Foedera illos iniisse, refert, feriendo brachia, qua humeris connectuntur, ac mutuum sanguinem delingendo.*
- (6) *Dipnosoph.* L. II. p. 45. edit. ISAAC. CASAVB. quem locum ita Latine interpretatur IAC. DALECHAMPIVS: *Ii namque humane ac benigne cum aliquos excipiunt in conuiuio, frontis vena tusa manantem sanguinem admiscent ei, quam bibendam offerunt, potioni: summam id esse amicitiam putantes, si suum inuicem sanguinem gustarint.*
- (7) De illo enim SALLVSTIVS in bello Catilin. c. XXIII. scribit: *Fuere ea tempestate qui dicerent, oratione habita cum ad iusiur. populares sceleris sui adigeret, humani corporis sanguinem, vino permixtum, in pateris circumtulisse; inde cum post exsecrationem omnes degustauissent, sicuti in solemnibus sacris fieri consuevit; aperuisse consilium suum; atque eo dicere fecisse, quo inter se magis fidi forent, alius alii tanti facinoris conscii.* Ex quibus intelligitur, quid sibi velit MINVTIVS FELIX, sanguinis foedere coniurasse Catilinam, scribens in *Octauio* c. XXX. Conf. quae IOSEPH. WASSE ad istum SALLVSTII locum commentatus est.
- (8) Ad TACITVM l. d.

§. XVIII.

Quam aliae gentes vim atque auctoritatem in fanciendis foederibus dextrae tribuerunt, eam prae caeteris Germanos coluisse, eo minus dubitandum est, quo maiorem illos laudem fide, constantia morumque integritate, consecutos esse,

nouimus, adeo vt fidem, vel in contractibus, vel in quocunque alio negotio, dextra datam, religiosae asseuerationis instar haberent. Impri-
mis autem, postquam feuda in vsu esse coepe-
runt, inualuit, vt, in praestandis hominiis, vasa-
lus *iunctas manus in domini manus immitteret*,
hocque modo et fidem domino sponderet, et ab
ipso in fidem solemniter reciperetur ⁽¹⁾. Quem
ritum suae sententiae plurimum fauere putant illi,
quibus nomen vassi et vasalli a Germanico verbo
vassen, quod ligare, stringere, vincire significat,
deducunt, et ex eo rationem solemnisi tituli ⁽²⁾,
qui vasallis hodieque tribui solet, rationem red-
dere student ⁽³⁾, secus ac alii, quibus magis va-
salli deriuatio a Celtica voce *Gwas*, iuuenem,
adolefcentem virum, item famulum, denotante,
arridet ⁽⁴⁾. Id vero non incongrue inde repe-
titur, quod, manum alicuius vestire, idem signi-
ficet, quod tradere, inuestire, manusque illius,
cui facta traditio est, vestita dicatur ⁽⁵⁾. Qui au-
tem communis primum fuit omnibus vasallis ri-
tus inuestiendi, temporis successu ligiis praeci-

pue frequentari coepit, qui, vti dominis suis arctiori vinculo adstringebantur, ita *implicatis manibus ligatisque pollicibus* ⁽⁶⁾ sacramentum fidelitatis solebant praestare. Quod et consuetudines feudales passim, et formulae iuramenti quam plurimae comprobant, quae, adhibita illa solemnitate, a vassallis pronuntiatae fuerunt ⁽⁷⁾. Ita, seruasse hunc morem reges Angliae erga Franciae reges, legimus, ob ducatum Aquitaniae, cuius intuitu se vassallos ligios sunt professi ⁽⁸⁾. Eodem modo Vrsus, Nolae et Atripaldi Comes, Ferdinando, Regi Neapolitanorum ⁽⁹⁾, fidelitatem ligiam iurauit. Neque vsquam facile luculentius huius rei exemplum deprehendas, quam in ritu, quo Philippus, Archidux Austriae, et Burgundiae Dux, de Comitatibus Flandriae et Artesiae, a Guidone *de Rochefort*, Cancellario Galliae, Ludouici XII. Regis nomine, Atrebatii ⁽¹⁰⁾ fuit inuestitus; ne quid dicam de Antonio et Carolo, Ducibus Lotharingiae, quorum alter Francisco I. alter Ludouico XIII. Regibus Gall. ob ducatum Barri simile homagium praestitit ⁽¹¹⁾. Neque ta-

men

men ita pertinere hunc ritum ad feuda ligia, existimandum est, vt plane omitti non possit.

- (1) Ex pluribus testimoniis atque exemplis, quae FRESNEVS voc. Fidelitas, et Hominium, hanc in rem adducit, vnum hic alterumue decerpisse sufficiet. Ita BRAC-
CTON. Lib. II. Tract. 55. §. 8. *Debet quidem tenens manus suas vtrasque ponere inter manus vtrasque domini sui: per quod significatur ex parte domini protectio, defensio et Warrantia: et ex parte tenentis, reuerentia et subiectio.* Consuetudo Normanniae art. 107. *La forme d'hommage est, que le Vassal noblement tenant doit etendre ses mains entre celles de son Seigneur etc.* Andegauensis art. 137. *Ayant les mains jointes en les mains de son Seigneur.* Illustre exemplum praebet Taf-
silo, Dux Boioar., qui, testantibus veter. Franc. Annal. an. 757. c. 17. *venit, in vassatico se commendans per manus, sacramenta iurauit multa et innumerabilia, reliquiis sanctorum manus imponens; et fidelitatem promissit Regi Pipino, - - sicut vassus recta mente et firma deuotione per. iustitiam vassus domino suo esse deberet.* Simile exemplum Gesta Guilielmi Nothi, Regis Angl. p. 189. exhibent: *Normanniae Ducem Guillelmum, sub quo tutus foret, supplex adiit, manibus ei sese dedit, cuncta sua ab eo, vt miles a domino, recepit.* GALBERTVS in vita B. Caroli, Comitis Flandr. n. 90. *primum hominum fecerunt ita: Comes requisivit, si integre vellet homo suus fieri: et ille respondit, volo: et iunctis manibus amplexatus a manibus Comitum, osculo confoederati sunt.* Ritum ipsum ob oculos ponit effigies, quam in fronte dissertationis exhibuimus. Desumpta illa est ex R. P. BERNHARD. MONTEFALCONII Monument. Monarch. Franc. T. III. vnde, maioris illustrationis gratia, sequentia hic transcribere visum est: *Eodem circiter tempore et paulo ante decessum Constabularii Guesclini et Regis Coroli V.*

Dux Borbonius hominum ipsi praeflitit pro Comitatu Claramontano in Bellouacensi agro. Quae res depicta habetur in Codice manuscripto hominum eiusdem comitatus, ad cuius fidem D. GAGNERIVS tabellam depictam suam delineari curavit. Esti vero Proceres et Principes eodem hic ordine locentur, quo in tabulis, idem praestitum hominum referentibus, quas publicarunt P. MENETRERIVS et ABBAS CAUSIACENSIS; haec, quam nos proferimus, ex diversa omnino tabula expressa fuit, ut primo conspectu visitur; unde arguitur, in Camera Computorum plures nonnunquam esse rei eiusdem tabulas depictas. Rex in folio suo sedet, pallio regio amictus, liliis consperso, assutis murium Ponticorum pellibus, coronam capite gestans. Ludovicus II. Dux Borbonius, ambas manus iunctas, intra Regis manus inserit, genu flectens, quoddam ceu sertum capite gestans, insignibus suis vestitur; pugionemque habet ab zona pendentem. A Regis latere, et a tergo pene visitur Delphinus, insignia Franciae, insignibus iuncta Delphinatus, gestans, et prope illum frater eius, insignibus Franciae cum limbo Aurelianensium Ducum indutus. Pone illos sunt tres Regis Caroli fratres; Andegauensis Dux cum ora rubra, Andegauensium Ducum nota; Biturigum Dux cum ora denticulata; Dux Burgundiae, cum insignibus Franciae et Burgundiae simul iunctis. Qui folio regium manum imponit, est Ioannes Artesius, Comes Augensis, ad cuius latus, et pone solum regium est Franciae Cancellarius, quoddam quasi sertum capite gestans, et virgam manu tenens. Infimo loco in eodem latere quinque proceres sunt, eadem linea et ordine positi. Primus est Constabularius Bertrandus Guesclinius, cuius insiponia haec sunt; in argenteo campo aquila nigra, duobus expansa capitibus, cum fasciola rubra, omnia supergrediente. Post illum sequuntur Marecalli Santerranus, et Blanuillaus, Hugo Castellionaeus, Domni-Petri Toparcha, Sagittariorum Magister, et Ioannes de Vienna, nauium Praefectus, qui omnes insignibus suis ornantur. Ii, qui Borbonium Ducem comitantur,
sunt

sunt Belli- ioci dominus, cuius vestis haec insignia habet: in campo aureo leo niger, cum limbo rubro; Nedoncbellenfis, Cambellanus Borbonii Ducis. Is oblongum baculum erectum tenet, in cuius summitate multae clauces sunt, clauces nempe, ut videtur, castelli Claromontani Bellouacensis. Pone illum est Reginaldus de Tria, cuius insignia sunt campus aureus cum diagonali fascia rubra, cui insidet alia fascia, ex argento et caeruleo colore composita, cum merula nigra. Sub illo est Ioannes Notbus Borbonius, ac pone illum Petrus de Auxio de Moncellis, cuius vestis tessellata est auro et rubro colore: eratque ille Ducis Borbonii Cambellanus.

- (2) Bester und lieber Getreuer.
- (3) Inter illos sunt BITSCHIVS in *Comment. ad Consuet. Feud. L. II. T. 52. C.* Satis bene p. 665. FRID. SANDE *Consuet. Feud. Geldr. Tract. prael. c. 1. n. 19.* et ITTERVS de *Feud. Imp. c. V. §. 1.*
- (4) vid. SCHILTER. *Inst. Iur. Feud. c. I. §. I.* ibique indicatos in notis.
- (5) Probat id inter alia *Lex Baiuvar. Tit. 17. §. 3.* *Mei antecessores tenuerunt (territorium) et mihi in allodium reliquerunt, et vestita est illius manus, cui tradidi.*
- (6) Nimium fere hic coniecturae tribuit ANDREAS KNICHEN de *Vestit. pact.* P. II. c. V. n. 95. dum hanc pollicum ligationem a Romanorum institutis repetit, ab ANGELO POLITIANO, *Miscell. c. 42.*, variis veterum, HORATII imprimis, IVVENALIS et PLINII locis edoctus, pollicem premendo fauorem innui, vertendo denegari gladiatoribus solitum fuisse.
- (7) Talem ex *Affisiis MSS. Hierosol. c. 189.* exhibet FRESNEVS voc. Ligius p. 202. *Quant home ou fame fait homage au chief Seigneur dou Roiaume de Hierusalem, doit estre à genouls devant lui, et mettre ses mains entre les soues, et dire li: Sire, ie deüens vostre home lige de*

tel fé, et vous promets je à garder, et à sauver contre tous ceaus et toutes riens, qui vivre et mourir puissent. Et le Seigneur li doit respondre, et je vous en reçoï en Dieu foi et la moie de vos droïts, sauve les miens. Et le doit baisser en la bouche en foi.

- (8) Eiusmodi est professio Eduardi II., Regis Angl., erga Philippum, Regem Franc., quam modo laudatus FRESNEVS ex Tabulario regio producit his verbis: *Nous reconnoissons par les presentes lettres, que le dit hommaige, que nous seïsmes à Amiens au Roi de France, combien que nous le feissions par parolles generalles, est et doit estre entendu Lige, et que nous devons foi et loyauté porter. Et pour ce que ou tems à venir de ce jamais ne soit contens ne desfort à faire le dit hommaige, nous promettons en bonne foi par nous, et nos succeffeurs Ducs de Guienne, entreront à l'hommage du Roi de France, et de ses succeffeurs, qui seront pour le tems: L'hommage se fera par telle maniere. Le Roi d'Angleterre Duc de Guienne tiendra ses mains entre les mains du Roi de France, et cil qui parlera pour le Roy de France, adressera ses parolles au Roy d'Angleterre Duc de Guinne, et dira ainsi: Vous de venez homme Lige du Roy de France, et lui promet-tés foi et loyauté porter; dites, Voire. Et le dit Roy et Duc et ses succeffeurs Ducs de Guienne, diront, Voire. Et lors le Roy de France recevra le dit Roy d'Angleterre et Duc au dit hommaige Lige à la foi et à la bouche sauf son droit et l'autrui.* Ita quoque in Homagiis Nobilium Vasconen-sium an. 1363. legitur: *M. Arnaud Amaneau, Seigneur de Labret etc. estant à genoils sans centure, ne chaperon, tenant ses mains iunctes par entre les meins dudit M. Lieutenant, est devenu homme lige du dit Roy de Angleterres: vt plurima alia loca, quæ FRESNEVS in Hominium congeffit, omittam.*

- (9) Totum ritum accurate describit IO. IOV. PONTANVS, de Bello Neapol. L. II. p. 1837. sq. cuius verba hic sub-iicere

licere e re nostra duximus: *Vrsus Neapolim ad regem profectus, iurauit de more Neapolitanorum regum in eius verba. Ritus vero iurandi, verborumque huiusmodi est formula. Sedet rex medius regia in sella, editiore loco constituta Assident iuxta primi ordinis optimates, ac proceres. Stant inde purpuratorum frequentes ordines, loco quisque suo: regis ad pedes, genibus innitens, a dextra procumbit parte epistolarum magister, qui nunc Secretarius dicitur: sinistra antisles, euangeliorum libros, regio in sinu astratos, tenens. Horum medius genibus et ipse ille innisus procumbit, qui in verba iurat, utraque manu libris adapertis imposita. Ibi epistolarum magister verba praeit: quae iuraturus in verba, sequitur. Igitur posteaquam Vrsus regios ad pedes prouolutus, palmam in codice vitramque expansam statuit, tum magister praeire verba haec coepit: Vrsusque ea est secutus: Vrsus ego Vrsinus, Nolae et Arripaldi Comes, Asculi, Lauri, ac Forini dominus, illorumque et agrorum, et finium, ciuium atque popularium, tibi Ferdinando regi, liberisque successoribusque in regno Neapolitano tuis polliceor, promitto, spondeo pro liberis, successoribusque in hisce item urbibus, oppidis, agris finibusque meis, fidelem meque illosque utique futuros, tuisque illorumque imperiis ubique, meque illosque parituros, atque imperata facturos, cum hisce urbibus, oppidis, agris, finibus, popularibusque perpetua cum constantia et fide. Si quid vero aduersus teve, illosue parari fraudis, doliue, insidiarumue audiero, sciero, compertumue, significatumue habuero, indicaturum illud e vestigio ac facturum palam tibi illisque: officia demum obiturum, meque, illosque omnia domi, forisque pace, belloque aduersum quoscunque, ac pro imperio, quae probi, et fidelis subiecti iure, lege, natura, obeunda ac praestanda sunt regi. Deumque bis Optimum Maximum testem inuoco, perque sacrosancta haec Euangelia sciens, volens, libensque verbis conceptis iuro. Atque bis dictis, manus ipse e libris sustulit. Tum rex Vrsi manus utriusque digitis pollicibusque apprehensis, suosque intra pollices iis insertis, deuinxit illos suis, statuitque super Euangelia. Hic rursum Vrsus, magistro praecunte*

verba : Ego me, inquit, cum liberis, successoribusque meis, Ferdinandi regis mei domini mei, liberorum, ac successorum eius, ligium hominem statuo, dedicoque eumque me hic sisto. Haec ter ubi dixit, regios osculatus est pollices, rexque ore suo illius os excepit, moxque comiter appellatum dimisit. Hic est usitatus iurandi mos in verba regum Neapolitanorum : quique ligios illorum se faciunt, ipsum hunc servant, dicti inde ligii, quod ligatis reges pollicibus, illos fidei, imperiisque sic suis vinciant, atque obnoxios statuant.

- (10) Descriptionem huius solemnitatis ex scriptore aequali, praeter THEODORVM GOTHOFREDVM, exhibet PHILIPPVS CAMERARIVS, *Meditat. Hist. Cent. II. c. 59.* Sed quod stylum inconditum illius saeculi sapit, magis iuvat ex nitidissimo Gallorum Historico, P. DANIELE, eiusque T. IV. ad ann. 1499. communicare : *Il y eut dans cette cérémonie des circonstances assez remarquables pour avoir place dans l'Histoire, d'autant plus que c'étoit une chose extraordinaire, que le Comte de Flandre, l'unique qui restoit des anciens grands Vassaux de la Couronne, ne fit pas son hommage entre les mains du Roy même. Le Chancelier y soutint parfaitement et avec dignité l'honneur de la Personne Royale qu'il représentoit. On prepara pour le Vendredy cinquième de Iuillet la seconde Salle du Palais Episcopal. On y mit une estrade à deux degrez, et on plaça dessus un Siège couvert d'un tapis fleurdelisé. Vn Gentilhomme nommé Thomas de Pleure, et quelques autres Officiers de l'Archiduc vinrent sur les dix heures du matin avertir le Chancelier en sa chambre, que ce Prince étoit en chemin pour se rendre à l'Eveché : il répondit que, quand il seroit arrivé au lieu où il devoit rendre hommage, on ne le feroit pas attendre. Vn peu après d'autres Officiers arrivèrent, et lui dirent que l'Archiduc étoit dans la première Salle. Il les écouta, et demeura en sa place. Enfin les Seigneurs de la Grutuse et de Frameselles lui annoncèrent que le Prince étoit dans la seconde Salle où il devoit faire l'hommage. Alors le Chancelier sortit de son appartement qui joignoit la Salle, vêtu d'une robe de velours cramoisi, le cha-*
peau

peau en tête, précédé d'un Huissier du grand Conseil, qui portoit sa masse haute et découverte, et de deux Rois d'armes du Roi, vêtus de leurs cotes d'armes, et suivi de quelques Maîtres des Requêtes et des Secrétaires du Roy. L'Archiduc salua profondément le Chancelier en se decouvrant, et lui disant, Monsieur, Dieu vous doint bon jour; et ce Magistrat sans dire mot, et sans se decouvrir, portant seulement la main à son chapeau, s'assit dans le Siège qu'on lui avoit préparé. Aussitôt l'Archiduc tête nue s'approcha et dit, Monsieur, je suis icy venu devers vous, pour faire l'hommage que tenu suis faire à Monsieur le Roy touchant mes Pairies et Comtez de Flandre, d'Artois et de Charolois, lesquelles tiens de Monsieur le Roy, à cause de sa Couronne. Le Chancelier demeurant assis et couvert, lui demanda, s'il avoit ceinture, dague, ou bâton. L'Archiduc en ouvrant sa robe, qui étoit sans ceinture, répondit que non. En même temps le Chancelier LVI PRIT LES MAINS QV'IL AVOIT IOINTES, ET LES MIT ENTRE LES SIENNES. L'Archiduc s'inclinant, comme pour se mettre à genoux, le Chancelier l'en empêcha, en lui disant. Il suffit de vôtre bon vouloir; ET LVI TENANT TOUIOURS LES MAINS DANS LES SIENNES, il lui fit la question accoutumée. Vous devenez homme du Roy vôtre Souverain Seigneur, et lui faites FOI ET HOMMAGE LIGE pour raison des Pairie et Comté de Flandre, et aussi des Comtés d'Artois et de Charolois, et de toutes autres Terres que tenez du Roi et de sa Couronne, lui promettez de le servir jusques à la mort inclusivement ENVERS ET CONTRE TOVS CEVX QVI PEUVENT VIVRE ET MOURIR, SANS NVL RESERVER; de procurer son bien, et éviter son dommage, et vous conduire et acquitter envers lui, comme envers vôtre Souverain Seigneur. A quoi fut répondu par l'Archiduc, Par ma foi ainsi le promets, et ainsi le ferai. Le Chancelier reprit en disant ces mots: Et je vous y reçois, sauf le droit du Roi en autres choses, l'autrui

l'autrui en toutes. Il lui présenta en même temps la jouë, et le baïsa. L'Archiduc demanda Aste, et les Lettres de la réception de son hommage, que le Chancelier commanda au Secrétaire Amyx de lui expédier. Après toutes ces formalitez, le Chancelier se leva, ota son chapeau et le bonnet, ou calotte qu'il avoit deffous, fit une profonde révérence au Prince, et lui parla de cette sorte : Monsieur, je faisois n'a gueres office de Roy, représentant sa personne, et de present je suis Guy de Rochefort vôtre très-humble serviteur, toujours prêt de vous servir envers le Roy mon Souverain Seigneur et Maître en tout ce qu'il vous plaira me commander. L'Archiduc repondit : Je vous remercie, Monsieur le Chancelier, et vous prie qu'en toutes mes affaires envers mon dit Sieur le Roy, vous me veuillez toujours avoir pour recommandé.

- (11) Formulas inuestiturae habes apud THEODORVM GOTHOFREDVM, *Ceremonial de France* Tom. II. p. 664. et p. 673.

§. XIX.

Quae supra in feudi ligii definitione summam indicavimus, ea iam operae pretium erit paulo vberius explicare. Imprimis affirmavimus, neminem, nisi qui nullum recognoscit superiorem, vasallos ligios habere posse. Quod vt co clarius pateat, examinanda nobis sunt, quae pro contraria opinione videntur pugnare. Inter illa regionum nonnullarum vsus principem tenet locum. Adducuntur enim quaedam Galliae exempla,

empla, vbi non solum Regis vasalli atque subiecti vasallos ligios habuere, sed etiam contra Regem bellum gesserunt (1). Sed quamquam negari non possit, antiquissimis temporibus maximam fuisse vasallorum in Gallia auctoritatem, adeo vt ipse Rex, constitutione singulari, maioribus vasallis concefferit vasallis suis ligiis in bello contra illum vti; neque inde inferiores isti vasalli feloniae rei existimati fuerint, vt fufius FRESNEVS ostendit (2): recentiori tamen aeuo arctioribus vasallorum potestatem limitibus circumscriptam esse, cum CAR. MOLINAEO, nulli alii, quam Regi ac Superiori ligeitatem praestari, in feudis vero dominorum inferiorum hanc vocem tantum abusiue sumi, recte contendente (3), agnoscit (4). Imo ipsa illa tam celebrata lex ad casum solummodo denegatae iustitiae est restricta (5). Vnde etiam superiori adhuc saeculo Rex Ludouicus XIII. Viauillium contra oppressionem ducis Niuerni, cuius erat vasallus, vt fertur, ligius, tuitus est, feudo illum priuare ideo conantis, quod grauidam vxorem suam ex mandato Regis aditu vr-

bis Rhemenſis, arcuiſſet⁽⁶⁾. In Anglia peculiari ſtatuto fancitum fuiſſe videtur, vt nemo, niſi Rex, vaſallos ligios habere poſſet⁽⁷⁾. Neque facile effingas caſum, quo vaſalli ligii dominis ſuis ſeruitia contra Regem citra rebellionis, quam omni iure vetitam eſſe, quilibet intelligit, labem, praeſtare queant, quippe in omni regno prima ſemper ratio haberi debet eius, penes quem ſumma eſt poteſtas.

(1) Vid. BOVLAINVILLIERS *Hiſtoire de l'ancien Gouvernement de la France* Tom. I. Lettre V.

(2) Diſſert. 13. ad IOINVILLAM.

(3) In *Conſuetud. Pariſ.* Art. 1. Gloſſ. 5. verb. Fief, §. 9. et 11. Idem ſentit ROSENTHAL in *Synopſi Feud.* c. 2. concl. 3. GOTHOFREDVS ANTON. In *Diſput. feud.* 1. th. 3. TH. CRAGIVS *Feudor.* L. 1. Tit. X. §. 13. aliique complures.

(4) In voc. Ligius p. 204.

(5) Totam legem exhibet CANTARELLVS FABER, caput autem eius quintum BOVLAINVILLIERS loco dicto, quod huius eſt ſententiae: *Si le Seigneur à ſon Homme-lige lui dit, venez vous en avec moi, car je veux y aller guerroyer le Roi mon Seigneur, qui me reſuſe la juſtice de ſa Cour, l'Homme-lige doit répondre en cette ſorte à ſon Seigneur. Monsieur, j'irois volontiers auprès du Roi, afin de ſavoir au vrai ce que vous dites qu'il vous a dénié ſa Cour. Et lors il viendra au Roi lui diſant ainſi. Sire, le Seigneur à qui je dois la foi m'a dit*

dit que vous lui aviez refusé le jugement de votre Cour, et pour ce je suis venu expressément savoir ce qui en est; car mon Seigneur m'a semoncé d'aller en guerre contre vous. *Et, si le Roi lui répond qu'il ne fera nul jugement en sa Cour, c'est à-dire, qu'il est le maître, et qu'on lui doit obéir, l'homme s'en retournera incontinent à son Seigneur, le quel lui doit fournir ses dépens; et, s'il ne vouloit aller avec lui, il en perdrait son Fief pour droit etc.*

(6) GRAMONDVS lib. II. ad annum 1616. et MEZERAU Histoire de la mere et du fils Tom. II. p. 109. seq.

(7) Colligit hoc FRESNEVS EX BRACTONO L. II. c. 35. §. 5. Quod etiam confirmat Charta sub Eduardo I. apud PRYNNEVM in Libertatibus Eccles. Angl. T. III. p. 201. *Quod cum dominus Rex, ratione Regiae dignitatis et coronae suae, tale habeat privilegium, quod nullus in Regno suo, de aliquo, qui sit de Regno Angliae, aliqui homagium seu fidelitatem ab aliquo recipere debeat, nisi facta mentione de fidelitate, eidem domino Regi obseruanda etc.*

§. XX.

Alia non minoris momenti quaestio hic occurrit, vtrum aliquis simul duorum dominorum vasallus ligius esse queat, quae a plerisque iuris beneficiarii interpretibus negatur, quia vnum ex illis semper excipere debeat vasallus, neque vtrique ligia possit praestare seruitia. Tantum autem abest, vt negantium argumenta nos moue-

ant, vt potius affirmatiuam amplecti sententiam nulli dubitemus. Non solum enim consentientes habemus leges feudales, quae, si praeter feudum ligium, quod iam possidet, aliud hereditario iure ab alio domino acquirat vassallus, tum recentiori per substitutum seruire permittunt⁽¹⁾; sed etiam ipsa feudi ligii indoli nihil inde decedit. Cum nempe hodie seruitia militaria plurimum per pecuniam vel milites stipendiarios praestari soleant, quae plerumque determinata sunt, vtrique domino, sine alterutrius laesione, fidem seruare auxiliumque ferre potest vassallus. Ita tamen hoc temperandum erit, vt non promiscue, ex vtroque feudo, sed ex eo tantum cuique domino subsidia mittat, quod ab ipso habet, adeoque obsequium non tam personale, quam reale, praestet. Rem egregie illustrat exemplum ducis Lotharingiae, qui de ducatu Barri regi Galliciae⁽²⁾, Imperio autem intuitu feudorum, quae ab illo tenet, ligio vinculo est obstrictus, et neutri tamen auxilia potest denegare.

(1) II. Feud. 99.

(2) Diu

(2) Diu quidem dubia fuit formula ducatus Barri, nota-que est acris de supremo illius dominio inter CHIFLETIVM et BLONDELLVM contentio, quorum ille pro iure Imperii *Commentarium Lothariensem*: hic pro iure Gallici regni *Barrum Campano-Francicum* edidit. Sed Rex Gall. in possessione vel quasi est domini directi.

§. XXI.

Praeter has quaestiones nonnulla adhuc singularia haud intacta relinquere possumus, quae, tanquam feudorum ligiorum propria, DD. recensere solent (1). Primum est, vt non admitatur poenitentia, secundum, vt vassallus personam, et consequenter omnia sua bona, potestati domini et eius iurisdictioni subiiciat, tertium, vt in inuestitura nominatim exprimatur, id, quod conceditur, feudum ligium esse. Primum quod attinet, adeo inter se dissentiunt interpretes, vt tot fere illud impugnasse videas, quot defenderunt. Qui affirmatiuam tuentur sententiam, ad leges feudales Longobardorum (2) prouocant, quibus venia refutandi feuda omnibus vassallis conceditur. Amplius vrgent, feuda in vtilitatem vassallorum concedi, cui pro lubitu quisque re-

nuntiare possit⁽³⁾. Contraria vero quibus placet opinio, contendunt, hominem ligium non posse ab obedientia et subiectione eius, cui fidem dedit, recedere⁽⁴⁾, feuda praecipue pactis inniti, quae non sine consensu utriusque partis dissolui possint. Alias enim vassallo, quando feudo satis fructus fuerit, iamque in eo sit, ut seruitia debita praestare debeat, semper integrum foret illud refutare, seu resignare: Si vero dominus nullum inde damnum perciperet, non denegaturus foret vassallo licentiam refutandi.

(1) Vid. GEORG. OBRECHTVS *Feudorum* L. I. c. V. n. 115. seqq.

(2) II. F. 38. 49. conf. IO. OTTONIS TABORIS *Exercitium Iurid. de Refutatione Feudi* c. III. inter opera eius, cura et opera ANDR. MYLII Lipsiae 1683. edita, Vol. II. p. 585.

(3) His subscribit ITTERTVS c. XXII. §. 9.

(4) BALDVS in cap. caeterum 5. de iudic. Idem ex SCHNEIDEWINO COPPEN *Obseru. feud.* 2. n. 35. obseruat.

§. XXII.

Alterum singulare duo continet momenta: vtrum magis inhaereat vinculum ligium personae,

nae, an rei, itemque an eo ipso omnia sua bona potestati et iurisdictioni domini subiiciat vafallus? Primum negare non dubito, cum neque leges, neque vsus illud corroborarent. Qui autem affirmare ausi sunt, vafallos ligios, aut cum *litis*, qui plane subiecti erant, aut cum istis, qui tam personaliter, quam realiter, se obstrinxere domino, et de quibus iam supra egimus⁽¹⁾, confuderunt. Cum vero nulla in alia re feuda ligia a reliquis differant, quam in conditione adiecta praestandorum seruitiorum contra quemcunque, neque in eo nobis differentia quaerenda est, in quo cum omnibus feudis conueniunt, scilicet vt obligatio eorum magis inhaereat rei, seu fundo, quem in feudo habent, quam personae. Hoc vel ex eo etiam liquet, quod, vafallo quocunque modo feudum ligium amittente, vinculum inter ipsum et dominum statim soluitur. Accedit, quod si non tam rem, quam personam afficeret vinculum ligium, nulla remaneret differentia inter subiectum et vafallum ligium, quos tamen longe distare, et nomina arguunt, et res ipsa docet. Quae omnia
si rite

si rite perpendamus, facile intelligemus, alterum momentum eo ipso corruere, quod nexus feudalis bona vassalli allodialia plane non comprehendit. Tertium denique, quod commemorauimus, singulare, nullo plane nititur fundamento. Sufficit enim, re ipsa feuda ligia esse, vt pro talibus habeantur, nec opus est, vt in inuestitura nomen exprimatur.

(1) §. X.

§. XXIII.

Cum igitur vinculum ligium neque subiectionem, neque personalem regulariter inuoluat obligationem, nihil obstat, quo minus Rex quoque vassallus ligius esse possit. Seruitiorum enim tantum militarium praestationem in se suscipit, quod non magis principis maiestati quicquam detrahit, quam foedus mutui auxilii inter duos principes, in quo alter ab altero aequae militaria auxilia stipulatur, salua vtriusque maiestate⁽¹⁾. In eo igitur solummodo differunt haec pacta, vt vni vinculum feudale adiectum, alterum vero simpliciter sit initum. Prostant etiam exempla, quae
fatis

fatis testantur, Reges a Regibus, immo ab inferioribus etiam, feuda tenuisse. Ita Reges Daniae olim, Magnum a Lothario II. (2), Suenonem et Waldemarum a Friderico Barbarossa (3), praestito hominio, inuestitos esse, historiarum docent monumenta, quae sollertissimus nobisque amicissimus foederum inter Imperium Rom. Germ. et Regnum Daniae interpretes, DETLREVENTLOVIVS, annotauit (4). Ludouicum XII. Galliarum Regem, a Maximiliano I. Imperatore inuestituram Ducatus Mediolanensis petiisse atque obtinuisse, scimus (5). Non minus, inter tractatus pacis Monast. Gallos, quantumuis alioquin gloriae studiosos, paratos fuisse, constat, et III. Episcopatus Lotharingiae, Metensem, Tullensem atque Virdunensem (6), et Landgrauiatum Alsatiae (7), in feudum ab Imperio recognoscere, earumque ditionum nomine tantundem ad collectas imperii conferre, quantum Electores; sed consultius visum est pleno iure illas Regi Gall. relinquere. Subinde etiam dominos directos inferiores esse vassallis suis, docent

exempla eorundem Regum Galliae, quos olim hominum Ducibus Burgundiae intuitu comitatus Bononiensis praestitisse, FROISSARDVS testis est (8). Item Rex Daniae a Duce Brunfuico-Luneburgensi tractum Stadtlandiensem et Budiadingensem in comitatu Oldenburgico feudali lege tenet (9). Similiter Electores seculares ab Episcopo Bambergensi de officiis certis inuestiuntur (10). Quae cum ita sint, feudaque ligia nulla in re differant a reliquis feudis, quam in promissione auxilii contra quemcunque hostem, illa quoque in summos principes cadere, tralatitium est. Nec hic destituti sumus exemplis. Pontifex enim Romanus Clemens Regem Siciliae vassallum ligium appellat (11). Pari modo Regi Galliae Eduardum II. Angliae Regem, vinculo ligio obstrictum fuisse, patet ex ipsa eius professione, quam supra exhibuimus (12).

(1) Qua in re consentit GROTIUS de I. B. et P. l. i. c. 3. §. 23. n. 2.

(2) De hac inuestitura HELMOLDVS L. I. c. 50. *Venitque Lotharius cum grandi exercitu prope ciuitatem Sleswick, ad*

ad vallum illud notissimum Dinewerth, ulturus mortem funestam optimi viri, Canuti. Confederat e regione Magnus cum immenso Danorum exercitu, defensurus terram suam. Sed territus virtute Teutonici militis, apud Caesarem immenso auro et hominio impunitatem indeptus est.

- (3) De Suenone ipse FRIDERICVS testatur in Epistola ad OTTONEM FRISING. apud VRSTISIVM Scriptor. *Rer. Germ.* P. I. p. 403. Idem confirmat OTTO FRISING. L. II. c. 5. et GVNTHERS in *Ligurino* L. I. v. 537. De Waldemaro testimonium perhibent RADEVICVS l. c. 24. et GVNTHERS in *Ligur.* L. VII.

- (4) In erudita Diss. de *Nexu foederum inter Imp. Rom. Germ. et Regnum Dan.* quam superiori anno in hac Academia ex cathedra JCTORUM dexterrime defendit.

- (5) Hac de re P. HEVERTVS *Rer. Austr.* Lib. VII. cap. 7. ita habet: *Exinde Rex Ludouicus Georgium Ambrosium, Cardinalem Rothomagensem, ad Caesarem in Germaniam, Hagenaë comitia celebrantem, mittit, suo ei nomine clientale sacramentum de Ducatu Mediolanensi ac Comitatu Ticinensi Angleriaeque diceret, quemadmodum pacis conditionibus superiori anno conceptis erat conuentum, praesentetque dimidiam promissae pecuniae partem, reliquum ex pacto numeraturus, cum Caesar in Italiam venisset. Ambrosius diploma a Caesare Hagenaë accipit, quo conditionibus pacis anni praecedentis Rex in possessionem Ducatus Mediolanensis, ut cliens a patrono, constituebatur. Huius diplomatis exemplum, Hagenaë dictis legibus septimo Aprilis huius anni exaratum legi. Formula iuramenti, a Legato nomine regis praestiti, sequentem in modum concepta legitur apud DU MONT, Corps Diplomatique Tom. IV. P. I. p. 60. Ego Georgius de Ambasia, Tituli Sancti Sixti Presbyter Cardinalis Rothomagensis ac Apostolicae Sedis de latere Legatus per Regnum Franciaë, promitto et iuro*
 I 2 nomi-

nomine et vice, et Mandato Serenissimi ac Christianissimi Domini Ludouici, Francorum Regis, uti Ducis Mediolani, vigore Mandatorum, a praefato Christianissimo Rege mihi traditorum, in Personam et animam ipsius constituentis, super Sacrosancta Dei Evangelia, per me corporaliter tacta, Vobis sacratissimo et inuictissimo Principi et Domino, Domino Maximiliano, Romanorum Regi semper Augusto, Domino meo clementissimo, Caesareaeque Vestrae Maiestatis Successoribus Romanorum Imperatoribus ac Regibus, sacroque Romano Imperio, quod praefatus Serenissimus Rex Francorum, ut Mediolani Dux, cum ipso Ducatu et suis pertinentiis vult et debet ex nunc in antea Maiestati Vestrae, tanquam Romanorum Regi, suo vero Domino, et Successoribus suis praefatis esse fidelis, obediens, et seruiens, bonum et salutem, utilitatem et honorem Vestrae Maiestatis, et Sacri Romani Imperii, pro viribus promouere, damna auisare, et auertere, iuxta omnem possibilitatem suam; et si ipsum in aliquo consilio esse contigerit, in quo contra Maiestatem Vestram et Sacrum Romanum Imperium quidquam actum aut attentatum fuerit, Maiestatem Vestram auisare debet et velit. Et alia omnia facere et adimplere, quae fidelis Princeps Vassallus Maiestatis Vestrae et Sacri Imperii, eidem Maiestati Vestrae et Sacro Romano Imperio facere, exhibere, et praestare debet et tenetur, dolo et fraude semotis. Ita me Deus adiuvet, et Sancta Dei Evangelia.

- (6) Constat hoc ex litteris Comitum BRIENNAE, d. 17. Febr. 1646. ad Legatos Gallicos scriptis, Tom. III. des Negotiations touchant la paix de Munster et d'Osnabrug p. 72. Il semble, que le dit Trautmannsdorff prétende faire valoir le desistement des dits Evêchez nous en laissant la Souveraineté: Mais de cela nous faisons si peu de compte qu'en acceptant la propriété nous nous contenterons de la Souveraineté regaliennne, et de les posséder avec les privilèges, dont jouissoient les Evêques et la Ville de Mets, sous la féodalité de l'Empire, en conservant néanmoins le Parlement, et privant la Chambre de Spire

Spire des appellations civiles, qu'on y relevoit, avant l'erection du dit Parlement, et on donne pour exemple, que le Comté de Bourgogne pour être Fief du même Empire, le comte ne laisse pas d'y avoir ses Juges Souverains, sous le même titre de Parlement. add. Acta publica in Continuatione XX. Diarii Europaei in Appendice p. 297. seq. sub tit. Bericht, was wegen der Meß: Tull: und Verdunischen Lehn: Sachen bißhero vorgegangen.

- (7) Id probant litterae Regis ad Legatos d. 26. April. 1646. *Sa Majesté consent bien de tenir le Landgraviat d'Alsace à titre de Fief, mais on ne peut pas passer la clause que les imperiaux ont mise pour restreindre cela au Roi, à Monsieur, et à leurs successeurs mâles. Sa Majesté desire donc, que l'on fasse tout l'effort possible, à fin que ce soit pour tous les Rois de France à venir, et en cas que cela ne se puisse absolument obtenir, que ce soit du moins pour tous les Princes de la Maison Royale présentemens vivans, ou leurs descendans mâles, qui viendront à succeder à la Couronne. Et paulo post: Sa Majesté estime plutôt avantageux que préjudiciable de payer les collectes à l'Empire, pourvu qu'on ait séance et voix deliberative dans les diètes, à condition qu'en contribuant autant qu'un Electeur seculier, ce soit pour tous les Etats qui demeureront à la France, relevant de l'Empire. Vid. Negotiations de la paix de Munster Sc. T. III. p. 163. iunct. p. 244. vbi extat consultatio, vtrum Galliae magis conducatur, terras ab Imperio cessas, in feudum recipere, an libero iure tenere?*
- (8) Quod ex Codice eius, manu exarato, SCALIGER, et ex eo FURSTENERIVS observat de *Iure Suprem.* c. XXVII. extr.
- (9) Conf. BILDERBECK *Teutscher Reichs-Staat.* P. IV. c. I. §. 23. ibique laudatos not. 36.

§. XXIV.

Nihil iam superest, quam vt, quae generatim haecenus de feudis ligiis adstruximus, speciatim ad feuda Imperii Romano-Germanici applicemus. Vbi quidem in limine statim deprehendimus haud paucos, qui, vinculum feudale ligium in Gallia et Italia non infrequens, in Germania vero plane incognitum esse, contendunt⁽¹⁾. Neque tamen minorem numerum *ITTERVS* ⁽²⁾ coegit eorum, quibus contraria sententia se probauit. Medii inter vtrosque incedunt, qui, sicut iam supra ⁽³⁾ obseruauimus, vel vinculum subiectionis cum nexu feudali ligio confundunt, vel ligium vasallum et immediatum vnum eundemque esse, credunt, adeoque hanc feudorum diuisionem ex hypothese sua feudis Imperii accommodant. In tanta scriptorum, in diuersa plane abeuntium, copia, in nullius verba iurare, sed ipsa rerum argumenta expendere tutissimum rati, feudorum ligiorum indolem, qualem supra exhibuimus, ad feuda Imperii omnino quadrare, breuiter ostendimus.

demus. Ad illam vero imprimis requisuimus, vt nemo, nisi supremus in Republica, possit esse dominus directus. Hoc in Imperio quoque locum habet, cum tota illius compages id non ferat aliter, et sola in illo suprema potestas ligios habere possit vasallos. Leges etiam feudales Imperatorem in omni sacramento feudali excipi iubent. Quae igitur de vasallis ligiis statuum Imperii afferuntur exempla, huc minime pertinent, et apertura castrorum, quam Hassiae Landgravius, Ludouicus, quondam a Comitibus a Waldeck aduersus omnes hostes suos, nemine excepto, sibi stipulatus esse legitur (4), non proprie, sed analogice tantummodo, clientela ligia dici potest. Argumentis, quibus in contrarium usus est IAC. CAR. SPENERVS (5), qualitatem ligiam in subfeudis Imperii admittens, in regalibus vero feudis negans, aliqua ex parte iam alii satisfecerunt. Neque dubia eius tanti sunt ponderis, vt facile remoueri non possint. Quae enim potissimum vrget, Imperatorem sta-

tus

tus Imperii in consortium summae potestatis ad-
sciuisse, adeoque sine illorum consensu bellum
gerere nequire, quin saepius, auxilia eorum re-
quirentem, repulsam tulisse, haec omnia non im-
pediunt, quo minus ligius nexus in illos cadat;
quandoquidem hic non collectivae, et quatenus si-
mul imperant, sed, tanquam singuli, sunt con-
siderandi, quo respectu, si bellum ab uniuerso
Imperio sit decretum, neque Imperator solus in-
tuitu provinciarum suarum illud suscepit, auxi-
lia ipsi et Imperio, utpote utrique fide feudali
adstricti, denegare non possunt, quod ex supe-
rioribus dictis ⁽⁶⁾ iam satis clarum est. Sicuti
praeterea indoli cuiusvis reip. convenit, ut, qui
illam constituunt, eam quoque aduersus hostes
omnibus viribus tueantur: ita iam antiquissimis
temporibus in feudis mos seruatus fuit, ut vassalli, si
nulla alia seruitia praestarent, patriam tamen de-
fendere oporteret ⁽⁷⁾. Neque vinculum illud
ligium libertati, cuius semper studiosi fuerunt or-
dines Germaniae, iuribusque illorum maiestaticis
quid-

quidquam detrahit. Namque, vti paulo ante monuimus⁽⁸⁾, neque personas eorum, neque reliqua bona, sed solum feudum afficit, pactoque imprimis innititur, quo se ad opem Imperatori et Imperio ferendam obligare consueverunt. Simili nexu etiam reges ipsi mutuo se obstringere possunt. Alteram notam, qua feuda ligia a reliquis distinximus, in eo posuimus, vt vassallus domino contra quemcunque, nemine excepto, auxilium praestet. Hanc itidem feudis Imperii esse conuenientem, eo minus dubii habet, quo magis ex iis, quae iam praemisimus⁽⁹⁾, liquet, bello Imperii declarato, statibus non licere neutras sequi partes, euidentissimo indicio, ab ipsis contra quemcunque imperii hostem auxilia esse mittenda. Nihil moramur, quod secus sentientes amplius obiiciunt, scilicet, neque in inuestituris feudorum Imperii, neque in formulis iuramenti, quod status praestare solent, vllam vinculi ligii fieri mentionem. Praeterquam enim, quod varia exem-

pla contrarium euincunt⁽¹⁰⁾, saepiusque etiam rerum Germanicarum scriptores ligios Imperatoris vasallos commemorant⁽¹¹⁾; iam indicauimus⁽¹²⁾, non opus esse ad essentiam feudi ligii, vt verbum hoc expresse inferatur sacramentis feudalibus; id quod in feudis Imperii non magis necessarium est, cum de fide statuum Imperii ligia ex constitutionibus publicis totoque Reipublicae Germanicae nexu iam satis constet.

Agnouit hoc personatus CAESARINVS FVRSTENERIVS⁽¹³⁾, pro libertate atque dignitate principum alias acerrime propugnans. Immo, qui inter ordines Imperii primum tenent locum, Electores ipsi videntur id professi esse, dum in Vnione Electorali, Rensae anno MCCCXXXVIII inita⁽¹⁴⁾, ita se ad mutua auxilia deuinxerunt:

Vnanimiter conuenimus et nos confederauimus, quod praedictum Imperium et nostrum principalem honorem, quem ab eo obtinemus, videlicet in electione Imperii, in illius ac nostris iuribus, priuilegiis, et consuetudinibus, sicut ab antiquo ad

nos,

nos, et ad Imperii electores peruenerunt, et deuoluta sunt, manutenere, tueri ac defendere, volumus, pro omnibus nostris viribus ac opibus, sine fraude, CONTRA QVOSCVNQUE, NE-MINE EXCEPTO; siquidem hoc nostrum bonorem et iuramentum attingit.

- (1) Inter quos agmen ducit TH. MICHAEL, apud KLOCKIVM, *Relat. Camer.* XXVI. n. 50. et 65.
- (2) de *Feud. Imp.* c. II. §. 12.
- (3) §. XII. sq.
- (4) In inuestitura Comitatus Waldeccensis de anno 1438. apud LONDORP. L. VI. c. 10. n. 2.
- (5) In *Primitiis obseruationum Historico-feudalium* Obf. II. not. o. sqq.
- (6) §. IX.
- (7) Quod supra ostensum est §. V. et VIII.
- (8) §. praeced.
- (9) §. IX.
- (10) Ita Ducem Lotharingiae contra omnes Imperatori et Imperio fidelitatem iurare sueuissse, ex formula homagii patet, quam ex CHIFLETIO adducit FVRSTENBERGVS de *Iure suprematus* cap. LVI. *Promitto et iuro ad haec sancta Dei Euangelia, corporaliter per me tacta, quod ex nunc in antea fidelis et obediens ero Vobis Serenissimo Principi et Domino - - - Romanorum Imperatori semper Augusto, Domino meo Clementissimo, omni-*

K 2

bus

bus Maiestatis Vestrae Successoribus Romanorum Imperatoribus et Regibus legitime intrantibus, et Sacro Romano Imperio; contra omnes homines: et non ero in consilio, participatione, vel tractatu, ubi quicquam agetur contra Personam, honorem aut statum Maiestatis Vestrae, et Sacri Romani Imperii, neque in id vlllo modo consentiam, sed bonum, vtilitatem et honorem Maiestatis Vestrae et S. Romani Imperii fideliter promouebo, et si quid tractari cognouero contra Maiestatis Vestrae Personam, honorem et statum, huic pro virili obstaro et Maiestatem Vestram incunctanter admonebo omniaque alia et singula faciam, ad quae fideles Principes et Vasalli Imperii Domino suo Romanorum Imperatori et Sacro Romano Imperio de iure vel consuetudine tenentur, dolo et fraude semotis: Ita me Deus adiuvet, et haec sancta Euangelia. Varias tabulas inuestiturae feudorum, quae Dux Lotharingiae ab Imperio tenet, commemorat, ipsamque feudorum designationem cum formula iurisiurandi, quo post initam Noribergae an. 1542. inter Ferdinandum et Antonium Ducem transactionem, Caroli, Antonii nepotis, nomine, fides obligata Imperio fuit, exhibet Illustr. M A S C O V I V S in Dissert. de *Nexu Regni Lotharingiae cum Regno Germaniae* §. XII. sq. Iuramento quoque ligio status Italiae Friderico I. Imperatori se obstrinxisse, R A D E V I C V S de *Gestis Frider. I. Lib. I. cap. 19.* testatur. Fridericum, Electorem Palatinum, anno 1559. simile iuramentum praestitisse, formula indicat apud G O L D A S T V M, in den *Reichs-Satzungen* p. 192. Ich Friedrich, Pfalzgrave bey Rhein, des heiligen Römischen Reichs Erbtzuchses und Churfürst, Herzog in Bayrn ꝛc. gelobe und schwere auf das heilig Euangelium, welches ich hiemit seiblichen berühre, daß ich nun hinführo von dieser Stund an, getreu, gehorsam, hold und gewertig sein sol und wil, euch dem Aller Durchleuchtigsten Großmächtigsten Fürsten und Herrn, Herrn
 Fer-